







平園續稿卷第六

周益文忠公集四十



題跋一

家藏御書

高宗御批陳思恭奏劄跋

建炎己酉七月高宗幸金陵平寇前將軍范瓊跋扈伏  
 誅瓊為河北制置使時王彥聚兵太行黥其面曰誓殺  
 金賊不負趙王號八字軍瓊嘗統之至是彥為御營使  
 司統制詔以此軍歸彥又分瓊餘兵四千七百人付神  
 武軍統制陳思恭思恭本韓世忠部曲是春苗劉反自  
 平江從世忠勤王有勞既得瓊兵遂乞衣甲御批依奏



下有御押歲久紙敝臣偶得之亟加池飾嘉泰甲子正月丙寅前史官周某謹記

淳熙戊申國書跋

淳熙十五年十一月五日丙申遣中書舍人鄭僑及武臣張時珍充金國賀正使副明年正月二日葛王殂僑等不能成禮而回二月二日壬戌適值光宗受禪九日己巳僑等入見上深惡之合將元國書徑納丞相收不必再奏禮物等國信所自合發付所屬亦不敢奏時從官尚謂不開陳依常例使副轉官嘉泰甲子重陽日

光宗御書跋

乾道壬辰春臣任春官兼直翰林院坐不草新除兩簽樞答詔以外祠罷光宗在儲極教對宮僚惜臣去淳熙乙未召還孝宗簡注方厚自兵部侍郎選兼端尹光宗實贊之陪侍六年凡御製御書或面賜或簽名封送真行粲然寶藏多矣逮戊申歲獨在揆路孝宗將內禪屢令留身討論典禮初議己酉春北使出門即擇日傳授偶聞太史局言二月旦太陽蝕九分臣密奏云太子聽政決旬不應便講避殿之禮可少展否孝宗大以為然曰朕亦可以當災遂定上旬壬戌吉因奏太子生於丁卯是日天地德合猶陛下生於丁未而壬午歲受禪也



退不敢以語人至正月末春坊姜特立相過云宮中人  
人知上元後舉典禮今悄然何也但遜謝云此非外廷  
敢與聞特立不悅而退意間言或自此入輔初政之三  
月內外交相睥睨遂請罷政紹熙庚戌起鎮鄉部避言  
官懇免明年三省擬鄭僑帥長沙光宗曰周其前宰相  
合先除授乃知天心念舊非人所可度甲寅遜位後數  
月臣亦謝事君臣契合夫豈偶然比敬哀高宗孝宗御  
書一二十大者刻石附以光宗翰墨各為之跋恭念紹興  
庚辰孝宗封真王三皇子共置小學教授一員專差館  
職選校書郎王一朋充頃之十朋輪對力攻揚存中又

在王卽議賓主禮異同十二月壬子着解兼職徒越之  
宗丞而去館職多闕臣任正字為之首宰執不欲自下  
越進他人特降聖旨云今後王府小學教授闕館職學  
官通差殆為臣設明日遂用國子博士劉藻丙辰擢藻  
祠部郎官當解教授而不解新制墨未乾也是則光宗  
就傳臣不得一至講堂詎知六年居唐省予敬書以示  
子孫使知被遇三朝本末如此為臣不易雖幸免於大  
戾歸美報上老矣無能為也抑詩有之倬彼雲漢為章  
于天言天子為法於天下也又曰追琢其章金玉其相  
言萬民觀而樂之也臣之志願不在茲乎嘉泰四年二



月旦

家藏法帖書畫碑刻

題山谷和郭內翰長篇

郭公諱知章字明叔吉州龍泉人事哲宗為臺諫從官  
徽宗朝歷刑部尚書翰林學士帥太原尹開封國史有  
傳予少時見友人羅良弼云郭明叔乃薄陶淵明心頗  
疑之後得公文集見元豐間宰分寧贈黃太史長歌其  
末云功名時來亦自然跨風絕海非為難肯學陶潛歸  
去來虛名浪得傳人寰然後知其壯年志在功名屈臨  
一邑不忍學淵明葉印綬而去庶幾善學柳下惠者耶

太史此詩即當時和篇亦知其銳意從仕故從史之尋  
果用鄭雍顧臨薦擢為御史多冠言路之句驗矣

自題寫真

此淳熙庚子予記顏也時年五十有五觀者以為酷似  
七兄贊之今十五年矣髮白面皺殆如他人所謂君顏  
老可憎特表本知常河性依然否如人飲水冷暖自知紹  
熙甲寅十二月十日子充題

題薛元亮老杜醉歸圖詩後

薛元亮名公家臨川佳士紹興間從許子禮李西美諸  
公游此詩乃其鄉人梁世昌名光遠錄以相示慶元丙



辰六月八日周某題

題六一先生手書後

右熙寧間文忠公與趙彥若元老帖江端友跋云先祖非戲言蓋往時風法華至人家見筆便書初無倫理公友江隣幾舍人亦以公見筆輒書戲比風僧此說載公文集試筆門端友即隣幾孫也慶元五年二月癸未周某題

題蔡君謨飛草帖

慶元己未仲冬餘干徐君來赴安福宰携此相示謂是君謨真蹟參以後帖又似他人作不能定也因命筆吏

臨本置秀岩堂平園老叟周某記

題唐人臨王子敬帖

王子敬異聞帖杜氏所藏云其祖正獻公併蕭楚公華陽帖得於蕭氏之裔孫相傳是唐人臨本或者楚公所臨耶

題吳說書

此詩乃吳說傳朋書而劉季高用名字及杼山三印意其愛而蓄之爾嘉泰二年八月二十四日平園老叟周某題

題蕭楚公帖



蕭楚公自負竒節未嘗以書名而字畫亦甚可觀蓋唐世風俗其雅尚如此嗚呼士大夫風俗根本其所當勉者何獨此一藝哉

跋王獻之保母壙志

右嘉泰癸亥越人掘地得古碑乃晉興寧三年乙丑歲王獻之保母李意如壙志也云善為文能草書王謝奴婢定小異耳又有小硯背刻王獻之永和五字二者以致行都別鐫此本四明樓尚書鐫摹以相示字畫固妙其辭則有望於八百餘年後守官之人自興寧距今適八百三十餘年預知如此蓋當時卜地如郭璞輩固不

乏也五月二十八日記

題米禮部參星賦真蹟

右米禮部參星賦筠州集本以為首篇其間意同辭異者多具列如上今秘閣有石刻字畫稍大此卷收歛豪逸秀傑痛快尤可愛重紙背題詩一聯不敢慢也嘉泰癸亥秋池州故人文思提轄葉楠之子之真自所居鐵園山附遞壽予其意厚矣乃標軸而識之七月望日平園老叟周某題

題孫氏四皓圖

嘉泰癸亥池州故人子葉之真既以米元章參星賦真



蹟為予壽又寄漢四皓像絹僅盈尺前有印文云孫汝  
節筆而之真以為孫顯節不知何時人蓋名畫也上有  
蘇文忠贊元祐三年二月揚次公書東坡諸集皆無之  
因記乾道庚寅閏二月過京口遊金山妙高臺壁間有  
東坡族姪成都中和院僧表祥繪公像公自贊云目若  
新上之憤心如不繫之舟要問平生功業黃州惠州崖  
州其為暮年所作無疑諸集亦不收乃知平生游戲翰  
墨散落何限如去黃日戲贈李琪詩偶見於李遠春渚  
紀聞之類是也八月壬戌平園老叟周某書

題祖妣秦國潘夫人書

右靖國元年辛巳祖妣秦國潘夫人從祖父初任忻州  
司法時與鄭州叔祖母姚氏書夫人富文忠公彌孫其  
云奉文乃運使金紫及奉使太師小字後批三管散一  
行金紫年十四代寫常記祖母張秦國道祖父之言舊  
小吏事上官極恭太守禮上法曹與他掾窄袖捧按此  
書亦云日起五更每日兩衙極邊小壘事體尚爾况藩  
府乎今儀門外雖有州縣官於此下馬牌然皆肩輿直  
造客位初到畧展衙禮遠不過三日近則是日亟免併  
記此以示後人嘉泰三年十月旦立石

題樂毅論



右夏侯泰初樂毅論以世傳兩石本校正與史記本注  
時：異同歐陽引文選所載今無之不可曉也嘉泰甲  
子二月乙亥周某其記

雜題跋

跋鄴侯遺事奏稿

右吏部郎新安朱公喬年家藏王荆公進鄴侯遺事奏  
稿一通與集中所載增損不同未知孰為定本公之子  
元晦為其言先君子少喜學荆公書多儲真蹟惟此紙  
有跨越古今開闔宇宙之氣將屬江西常平使者汪季  
路刻石臨川仍抄日錄奏對家傳本語附其後幸為我

識之其亦竊怪宇文黑獺蘇綽能以區區西魏置府兵  
強其國及熙寧全盛之時欲創上番義勇則反以為疑  
獨何歟蓋東西魏之分孝文立都關中僅有隴右河西  
之地風俗尚武兵農未判用新造之偏方行一切之號  
令故為力也易今以百年無事萬里之中國一旦將復  
古制兵重於水農重於括而欲詢謀僉同草習俗之已安故為力  
也難昔者堯舜三代雖曰明道制衆然美成在久立政  
造事亦非一時所能備彼西魏享國不長降周迄隋濟  
以唐太宗之英明方覲成効荆公因聖語而謂其施有  
漸蓋知此矣厥後謝昭文表復云苟貪歲月趣就涓埃



是又知時難得而易失也耶故詳論之使後之君子得以考焉紹熙五年二月

跋汪聖錫與武義宰趙醇手書

玉山汪公名重天下人得尺牘榮之今觀此帖則於舊僚趙令傾倒至矣其人亦可推也公中年嘗苦日疾頗憚親染虞丞相雅善公：帥蜀時因占吏答書遂稍相失公為予言如此其後數予通問皆季路代作當時翰墨已難得况今日乎况後世乎紹熙五年四月旦周某題

跋東坡挂酒頌

東坡自海南歸文章翰墨所謂毫髮無遺恨波瀾獨老成者挂酒頌其一也今閩浙川本皆以心服為心腹御瘴為禦瘴輔安五臟為五神殆隨手有所改定耶紹熙五年四月五日故人徐思叔赴曲江幕官携以相示敬題其後他日或呈似韓史君刻石置九成臺銘之側亦奇事也周某子克甫

跋德化縣陳氏義門碑

胡周父史筆文章著聲三朝義門碑甚有古風中經兵火得賢宰呂仁甫表而出之又可傳遠予恐拓本頗艱為刻板付陳氏裔孫兼善使携以歸凡族人皆當遺之



一本惟其有之是以似之尚其勉旃高山仰止景行  
止予亦庶幾焉銘以居官為若官疑後來碑誤紹熙五  
年 月十七日

題吉州司戶趙彥法所藏山谷帖

紹聖元年甲戌夏山谷得郡武昌未赴坐蔡卞奏乞疏  
問前修神廟 錄詆誣事改授亳祠即開封府界七月  
至陳留寓東寺之淨土院：有深明閣書此二詩贈表  
姪季繩武翰墨燁然照人時年五十是臘貶黔州後一  
百年當紹熙五年甲寅八月旦周某敬觀

題汪季路所藏書畫四軸

右汪季路所藏歐陽文忠公在政府與蔡忠惠公兩帖  
其一蔡公自題十字蓋嘉祐八年八月自翰林學士右  
諫議權三司轉給事中正除三司使時也其一稱端明  
侍郎則後二年當治平乙巳二月解三司除端明殿學  
士轉禮部侍郎出守杭州時也李敷乃尚書都省令史  
見文忠公祭石曼卿文殆亦忠惠故吏耶後人但謂二  
帖有遣敬往復之語後又適題二十六二十九日遂以  
為先後之序宜正之紹熙五年九月旦周某書

右高學士家樂毅論歐陽文忠公集古錄跋云碑石燬  
於回祿而尤延之謂無錫徐氏蓄此碑殘缺已甚得非



後人摹刻者即乾道己丑同年史志道又以文忠所藏刻之金陵失真愈多茲乃天錫楊氏舊物近世士大夫家絕無而僅有也紹熙五年九月旦周某書

蔡忠惠公大字端重沉着宜為本朝法書第一紹熙五年九月十二日

吳畫在唐已有妙絕動宮牆之稱况數百年後乎哉或謂繡帛久則飛揚湏良匠乃能補葺今赫蹠如新何也然滄浪東坡翰墨在前後來名勝跋語盈軸可謂珍玩矣

跋劉賓之浩然集

故人李盛祖文力學能文辭然狷介少許可嘗著章貢志郡有大家事實當書而丐婉其詞者正色拒之坐是獲怨謗弗恤也獨為門人劉君昕作沉刻極道其孝於事親與人交重氣概不幸嗇於壽一子江童卅歲然期有以立已而遂與計偕念君之不及見也哀平生所為古律詩五十篇求工部尚書謝公昌國序而傳之觀此可以知吾祖父非諛墓者矣紹熙甲寅十月甲辰

跋何居仁自作墓誌

故修職郎臨江何安宅字居仁長予十六歲紹興辛未同上南宮是春朝廷待陳公景明使還知舉試期特緩



四方舉子知秦丞相以言語罪人會於逆旅不敢及時  
事獨居仁學廣文多泛論古今來聽者惟恐後如司馬  
長卿之傾座也已而高談濶論頗為鄉校之議其去者  
亦惟恐後又如列侯陳遵之驚坐也今四十有四年追  
思如昨日事適其子鄉貢進士挺出示居仁自作墓文  
太息書其後紹熙甲寅閏十月

題宜春李椿詩卷

始余自湖南歸江西以紹熙甲寅正月三日過宜春得  
郡人李椿永年詩書各一通知其種學績文非一日也  
屬客衆且余並行不及款冬十一月十有三日李君復

畫寫詠古詩三百篇携以相訪蓋平時玩味經史遇古  
人窮達利害成敗得失有會於心者各為數韵以紀之  
議論折衷往往出人意外表彼胡曾絕句未足道也求余  
言識其後老諄荒廢莫能措詞回思少年間有是作姑  
錄一二為答夫投我以驪珠報君以魚目貴賤固殊矣  
稠載而往垂索而歸得毋為鄉人所笑乎

題魯伯震所得子中兄二絕

子中兄自數歲已能詩稍長凡古人篇章無不窮極根  
源採擷菁華中年以後深味禪悅雖遇興間有賦詠要  
非所好也三十年前嘗以一二寄余今詩人陸務觀一



見謂句法入律無愧古人識者以為知言曾君伯震得此二絕句可以自信不疑坐進此道也慶元乙卯二月十二日

題李玠叔詩文

李公諱孝先字玠叔元祐元年賀范忠宣入西府啟草如右又嘗有詩題餘干縣於越亭云吳越相干地要衝樹亭危岸勢憑空寒潭倒影黃昏月古木喧聲白晝風鷗鷺慣來窺燕席煙雲無着護簾櫳淒涼故國多遷變獨有溪山在望中誦此詩觀此啟則公文行宜為忠宣所知惜乎忠宣大用之明年公遽謝世又明年而忠宣

遂相不及引類當時惜之雖然豐積畱取後世將昌豈必在其身耶虞部乃元豐以前官稱至元祐則當易朝奉即因奉孫兼新宰兼遠示遺墨為詳記之慶元乙卯二月五日周某子克

題陳誠之遠明樓記

陳君誠之示遠明樓記而請曰宜秋宜春山谷誠齋已各言之起居飲食與四時之景接賢兄之論則然丐公補其說予曰夏宜急雨有瀑布聲冬宜密雪有碎玉聲如此則四時備矣誠之曰樓覆以瓦似非所宜予曰六月卷簾森映山之銀竹同雲垂野從玉帝以萬妃憑欄



送目宜乎不宜誠之謝曰宜哉慶元乙卯三月十二日

跋百醉老人趙士墩詩卷

味百醉之名誦三篇之詩公益師友陶靖節者晁景迂乃謂得句法於江西殆由禁錮初開詩社勃興人以著錄為寵故一時之言如此若李雲龕陳簡齋汪龍溪跋語則不易之論也慶元乙卯四月十六日

題劉昌詩母墓誌

唐人欲銘其先世必得韓雲卿之文李陽冰之篆擇木八分書乃稱三服今臨江劉君昌詩有母賢其沒也鄉人徐思叔為誌謝昌國題額而趙從善書之蓋庶幾焉

慶元乙卯六月八日周某題

題謝昌國與朱陞書

尚書謝昌國稱嚴陵朱君陞公廉勤敏元樞黃德閏從而實之蓋嘗任左藏西庫監官上戊申大禮會計冊知諸路郊祀之貢區處得宜入可支出且有贏焉其居官不苟類此秩滿格當擢用以未脫選階一轉而為撫州宜黃宰尚有可諉曰大邑也今再轉乃為英之含先是特瘴鄉三家村耳何其愈下耶君曰某歷十二考為王官為壯縣尚闕職司之章良由中朝近地英俊所聚無有取知於人故欲求諸遠爾予曰雖處囊則鋒必露鶴



群難則潔易知通籍審官其在此行乎克子之公廉勤  
敏可也慶元乙卯六月十日周某題

跋蕭唐叟時菴記

蕭君唐叟嘗示予易說矣今復以時名菴而求宜春歐  
陽永年為之記謝公昌國揚公廷秀為之跋而丐予一  
言夫艮止也其象乃曰時止則止時行則行君既有得  
於此予固無以伸其喙雖然剛柔者立本者也所以况  
卦總主一時之事也變通者趨時者也所以况爻就一  
時之中而趨其所宜之時為是道也豈特艮而已自乾  
至未濟諸卦皆然夫惟君子而時中然後動靜不失其

時其道光明君其勉之慶元乙卯六月十八日周某題

題顏魯公書撰杜濟神道碑

右顏魯公書撰杜濟神道碑記沉着端重真可入木八  
分友人曾三異無疑寶藏之按六一先生集古跋謂殘  
缺不能成文今乃燦然可讀得非摹拓有先後耶濟蓋  
魯公友壻故又誌其墓六一先生亦有跋云顏撰而不  
云書然筆法非魯公不能為世頗以為非顏書更俟識  
者辨之今考魯公文集大抵碑詳誌畧亦微有異同如  
碑以濟祖任明堂丞誌則云令碑以濟為惠第二子誌  
作第三又碑與誌並歷渭南宰而文集于碑中乃以為



尉皆傳寫之誤當以此碑為正慶元乙卯六月二十日  
周某書

跋金給事彥亨文彙

某幼學之年已聞黜歛金公彥亨為名御史論擊權疆  
無所避紹興戊午春以母憂去朝服闋秦丞相抑而弗  
用凡二十年當己卯歲高宗以宗正少卿召還歷禮部  
侍郎給事中壬午六月壽皇初即位眷待良厚是秋某  
以起居郎兼中書舍人同在後省見公直諒多聞年高  
而德劬每與從官嘆其不可及吏部徐侍郎度因為某  
言政和宣和後生少讀史一日沈狀元晦以博學至京

師東南士子翕然宗之來者滿門聞舉古事莫不竦聽  
惟公在下座數搖其首鄉人問故則云某事非也退而  
考按信然蓋公於史傳皆能默記叩之徃：成誦迄今  
不以史書自隨其學問可知矣此某聞而知之者也若  
夫事上不欺聞義則徙其所親見又有可紀者宜表而  
出之九月己未某兼西掖之二日有旨婉容翟氏進封  
本位官吏並合推恩內礙止法人特與轉行即今壽成  
皇太后也時給舍例同銜繳駁某密語公妃嬪位非中  
宮即醫流皆礙止法前德壽推江上扈從賞今上覃恩  
並不轉行止令回授似當論奏公嘆曰君言是也迨夏



賢妃位推恩其實未晚已書牘行下今恐相戾君自繳  
奏可也某曰若爾尚可商量庚申講筵公與其偶皆以  
職事先後留身初不知公奏何事某待班廷下望見公  
再拜殿上公退而某升甫至榻前上迎勞云朕初止謂  
卿能文適金安節說卿欲論婉容位轉行礙止法事不  
謂卿剛方如此可便進文字來方悟公自引前事以為  
失也章既上御批十三字云依奏夏妃位官吏亦令依  
條回授後三十四年公之孫承直郎鑄錢司檢踏官箠  
示持公文豪二篇求予一言因題其後非獨著公盛德補  
家傳之闕亦以彰壽皇從諫如轉圜他日史氏或有考

為至于文辭典雅如其為人識者自知何待贊也慶元  
元年九月日具位周某謹書

跋范丞相覺民謝罷政表稿

庚戌夏五月高宗行在會稽高平公自參知政事拜右  
相年三十有一明年改元紹興秋七月坐討論事罷政  
奉祠故謝章有惜名器裁苟得之語汪翰林草制猶引  
敬王如孟子選衆舉臯陶可以知其無他矣本朝惟王  
溥初相時年三十二然其除拜乃在周朝非公比也未  
強仕而薨不及再用迄展經綸之蘊惜哉慶元二年十  
月二十八日前進士周某題



又題范覺民與諸人唱和詩

耿伯順韓子蒼范元長李西美李德升謝任伯宣和以  
來文人才士也高平公或同侍從於靖康之朝或嘗引  
類於南渡之後觀此詩軸唱妍酬麗三嘆而有遺音矣  
慶元三年十月二十八日前進士周某題

跋張忠獻公答宋待制手書

右張忠獻公紹興九年秋起鎮長樂答徽猷閣待制宋  
公景晋手書一幅不過數十字而公私曲折故舊情意  
備焉宋公曾孫文成謀刻之石初李伯紀為靖康執政  
景晋以侍從克發運使徽宗南幸時皆有調護歸京闕

之勞其後伯紀帥洪宋為寓公此其所以眷也慶元  
乙卯十一月三日周某題

題張右丞如瑩奏疏

澹古張公以文章才略被遇高宗越即位之三年自獨  
拜尚書右丞適值苗劉反逆預政兩月而去平生奏疏  
號為通達國體當紹興五年春虜兵初遁高宗用趙忠  
簡公奏詔宰執條具善後之計公上疏五六千言援古  
証今事：皆有規畫向使久在政地盡行其言何患不  
為名宰相惜哉慶元乙卯十一月二十一日前進士周  
某題



跋六一先生跋杜濟神道碑

右六一先生跋唐杜濟神道碑蓋集古第四百五卷也今吉水縣鄉貢進士曾三異有此碑而未殘缺其文可讀得非嘉祐以前舊本欽慶元丙辰正月癸卯周某為皇諸孫彥法題

跋獨孤延壽碑

唐初歐虞褚薛皆以書名此碑精勁可愛不知出於誰手趙明誠金石錄列之第五百九十五謂無書撰人姓名今其前乃題于志寧製文又謂君諱某字延壽名殘缺不可辨今熟視之名左從言右亦彷彿可尋至于隋

唐間人多以字行則歐陽文忠公跋顏勤禮神道碑論之矣友人曾無愧持此相示為題其後慶元丙辰正月癸卯平園老叟周某題

平園續稿卷第六終



Blank columns for text on the right page.

平園續稿第七卷

周益文忠公集四十七

題跋二

跋後漢樊常侍碑

右後漢樊常侍碑歐陽文忠公已有跋今其文章可讀以永壽四年二月卒是年六月改元延熹八月丁酉制詔湖陽長劉搯追授騎都尉印綬至二年十一月其子勒文碑石俾不失墜而趙明誠金石錄乃以為元年八月蓋因贈官而不考立碑在後也慶元丙辰正月癸卯平園老叟周某書而歸之魯氏

跋歐陽堯祠碑



堯祠碑在集古錄為第七百九十一卷左氏傳云巡群  
屏攝正義謂束茅為之國語云屏攝之位注以屏為屏  
風攝如要扇二義雖殊其指主人祭祠之所則一也今  
跋以攝為攝或疑其誤豈得漢碑亦以為攝豈古人傳  
寫不同抑事神之際當屏息攝伏以致其恭或為屏蔽  
之屏攝以威儀之攝也廬陵祠曹趙彥法示此跋敬題  
其下為輕改古書者之戒慶元丙辰正月癸卯周某題

題揚謹仲芍藥詩後

淳熙甲午奉祠廬陵三月十七日會同年揚謹仲周孟  
覺賞芍藥嘗櫻桃謹仲有詩予次韵云清晨自掃落花

廳小甕親篋竹葉青簪盞莫辭過陋巷臚傳相與記彤

庭塔翻紅葉曾重見

僕兩直西掖

勅賜朱櫻亦屢經老去飄

零無此夢詩來吟咏有餘馨今二十有三年二公墓木

已拱因彭君仲識攜謹仲帖相遇且索舊詩為之悵然

此花最盛於太和而以紅都勝黃樓子為冠如牡丹之

姚黃也黃樓歲得之都勝者邑中惟一二家有種惜不

與人去年予答鄉貢進士陳恂二小詩云芍藥名先記

鄭風那因嘉木辨雌雄

韓魏公以芍藥為花后

姚黃後出今王矣

合把黃樓列上公六一先生舊帥揚分寧太史尹西昌

只緣未識紅都勝如杜詩中闕海棠蓋許元寄歐陽公



詩云芍藥瓊花應有恨維揚新什獨無名公答云偶不  
題詩便怨人山谷宰太和時篇詠甚多未嘗及此花今  
謹仲帖云花出怨語與古事相類併錄惡語于後慶元  
丙辰正月戊申周某書

跋胡忠簡公和王行簡詩

予嘗評胡忠簡公詩有不可及者三用事博而精下語  
豪而華一也士子投獻必用韵酬答雖百韵亦然蓋愈  
多而愈工二也此篇和王君行簡時年七十五長歌小  
楷與四五十人無異三也行簡世家臨川志大而瞻于  
文久從公遊其人亦可知矣慶元丙辰四月七日

題羅起宗廟食碑

紹興二十二年秋贛兵環攻南安以石壓卵未足喻其  
危稅官羅君起宗獨冒白刃三入賊壘說之使去城賴  
以全當時雖不與賞今乃附享神祠夫人爵不過顯一  
時廟食自當傳百世羅君可以無憾而其子孫亦足自  
慰矣慶元二年四月十一日

跋王民瞻送胡邦衡南遷詩

有澹菴壓嵩岱排淮泗之舉然後可以發盧溪穿天心  
透月脅之詩不如是不稱二絕澹菴授之從弟廉夫鏐  
廉夫復授其子渙所謂文獻相承衣鉢單傳者若能刻



石人授之本則法周沙界矣慶元丙辰四月十四日

題京仲遠與周孟覺帖

孟覺與予同宗同郡同年昔忝從班每有哀窮悼屈之心而未嘗効拔茅連茹之力孰知其子乃能于三十年後持相國帖自歸于光範乎愧嘆而書卷尾其時日則誠齋題字之信宿也慶元丙辰四月二十三日

御書樂毅論跋

臣伏讀高宗皇帝翰墨志云魏晉以來筆法無不臨摹又云每得右軍書手之不置初若食蜜少甘則已末如撤攬真味久愈在也故尤不忘于心手紹興三四年間

嘗臨羲之所書樂毅論以賜樞臣韓公肖曾之世傳高氏石木間節三十餘字得非御府別藏真蹟自不同耶後六十有三年樞臣之孫前韶州守臣亞卿示臣使記歲月恭惟龍鸞飛動衆所共窺天日清明臣何敢繪慶元丙辰四月二十八日具位臣周某謹再拜稽首書其後

題呂獻可墓誌

呂公獻可以熙寧四年五月卒八月葬時王荊公正任相位司馬文正公誌銘不斥其名不沒其實制公見之亦無所發其怒前謂樞密副使者陳丞相賜叔也方以



憂去牽聯潛其姓名可謂深得史法矣是時太僕卿劉仲通自請書丹而命其子忠定公器之秉筆斯文既出其誰不知邵伯溫乃謂仲通初雖有請見文復遲回不敢器之代父書之仲通又勸呂氏諸子勿摸本恐非三家之福按國史仲通剛方人也押伴夏人折正其章服奉使却乘常寶貨歸論不宜輕用兵因早條新政不便者五事又上書論人主不可輕失天下心是豈徇時畏禍者哉設有前却之意器之亦安得強其父而陷之罪也大抵邵氏聞見錄頗多荒唐凡所書人及其歲月鮮不差誤因是略為之辨此碑當日號三絕謂其人與文

及書也真蹟藏名相劉忠肅公元孫無欲家嘗以示忠定公曾孫孝昌孝昌念祖之心切將傳之副墨而力不足會湖南部使者吳仲權鎰助其費久之乃能成是以傳遠矣慶元丙辰五月九日具位周某謹識

跋張仲宗送胡邦衡詞

長樂張元幹字仲宗在政和宣和間已有能樂府聲今傳于世號蘆川集凡百六十篇而以賀新郎二篇為首其前遺李伯紀丞相其後即此詞送客貶新州而以賀新為題其意若曰失位不足弔得名為可賀也慶元丙辰五月十三日題



題蔡忠惠公帖

其之先君秦國公平生喜學蔡忠惠公書家藏京師舊  
右刻兩卷真行草畢備妙絕一世乾道間公曾孫戶部  
尚書洸來守廬陵摹寫雖轉寫失真而典刑故在  
今公元孫戶部侍郎戡出帥豫章復刻公遺墨俾某記  
其歲月恭惟高宗皇帝天縱游藝嘗評公書為本朝諸  
臣之冠且有入格律度驂騑之褒天監在上誰敢措詞  
惟公當仁廟天聖八年擢進士甲科名在第十後百三  
十有七年歲在丙戌孝宗龍飛策士侍郎復踐世科名  
次若合符節詩云惟其有之是以似之慶元二年五月

二十二日

題陳忠肅公尊堯集稿

陳忠肅公以元符庚辰入諫省力論蔡京姦邪第十安  
引王安石日錄詆誣神廟未幾出守無為軍明年改元  
靖國入為都司上書責曾布併及私史事復出 海陵  
又明年當崇寧壬午貶徙廉州此稿乃當時筆也書成  
名曰合浦尊堯集繼為四明尊堯集其詆蔡氏愈力不  
翅數萬言厥後果有靖康之亂公可謂忠也已矣可謂  
明也已矣真蹟在公壻前衡陽太守蕭君懋德家衡州  
之孫必得携以相示因為記其歲月仍錄國史本傳使



併藏之慶元二年五月二十八日

跋歐陽文忠公誨學帖

歐陽文忠公年二十有三以玉不琢不成器賦冠國子監其後十六年而次子奕生奕字仲純胡文恭壻性個儻文章豪放尤長于詩多至三百篇公以其質美書此以勵其學惜乎得年終三十四位不及顯然熙寧末鄭俠得罪凡通問者皆獲譴仲純獨傾貲送之其大節如此可謂不墜先訓非學力乎帖已刻而真蹟今藏郡人胡祇家祇字仲本亦佳士慶元丙辰六月庚戌

跋徐夫人所書華嚴經梁皇懺

鬱林蔡侯子羽故母徐氏三衢人宣和間刑部侍郎諱敷言之女潛心內典學虞世南書嘗手寫華嚴經梁武懺皆終部帙所謂婦人自得度者其子將藏是書予名山求予一言予謂夫人為善如此郝氏之業在所不論二經果報寧復唐捐華嚴經云南方國有長者妻名曰善慧見佛神力心生覺悟法華經云比丘尼憍曇毗得佛授記後名光相如來予知夫人此念不斷盡未來世當證二說豈止資其冥福而已慶元丙辰六月丙寅

跋胡忠簡公論和議稿

紹興戊午胡忠簡公年三十有七以樞密院編修官上



書論和議此其稿也時長子方生未幾南遷公知後禍  
叵測惟從姪昌齡字長彥賢而可托故以橐屬之今五  
十餘年矣昔顏魯公與魚朝恩論坐位帖橐摹本已數  
百載人爭傳寶公之所論豈止坐位而其心畫端勁實  
法魯公自當並傳于百世慶元丙辰六月

題羅煒詩橐

友人永豐羅永年長子煒天才雋敏而苦于學遂至墮  
生予讀其詩橐而悲之永年求予一言昔人謂詩能窮  
人或謂非止窮人有時而殺人蓋雕琢肝腸已乖衛生  
之術嘲弄萬象亦豈造物之所樂哉唐李賀本朝邢居  
實之不壽殆以此也今於羅氏子猶信慶元丙辰八月  
六日平園老叟周某書

跋焦伯強與潘簡夫帖

歐陽文忠公贈伯強詩云焦生獨立士勢利不可恐又  
云皎々寒泉水其清正如此余哀文忠公集于書簡門  
得公與伯強帖凡十有六意愛之厚期待之遠情見乎  
辭今觀伯強遺永嘉潘簡夫十六帖淵源蓋有自矣簡  
夫諱約後為伯強壻三子文饒字民則文孝字少穎紹  
興間相繼擢第文虎字叔山亦嘗魁薦鄉評推為少穎  
之子檜今為臨江軍職官奉檄至廬陵出示此軸為題



其後慶元丙辰中秋平園老叟周某

跋呂伯恭日記

黃太史晚謫宜州自崇寧四年歲旦起但凡風雨寒暑親舊  
 往復以至日用飲食之類皆繫日書之名曰乙酉家乘  
 止八月晦九月則易箒矣呂太史抱病東陽亦有日記  
 起淳熙庚子春盡辛丑七月壬寅其明日遂卒蓋絕筆  
 也方病時出入起居雖不逮山谷而編大事首周敬王  
 修讀詩記自唐無衣攷：課程所謂造次顛沛必于是  
 者兩賢相去七十餘載何其相似也意長日月短悲夫  
 慶元二年八月二十六日

跋廖中五行精記

天錫九疇一曰五行凡天地人有形則有數有數則固  
 于五行是善卜筮者預能測知人居其間又顯可推  
 者傳不云乎死生有命富貴在天豈術者之臆說哉春  
 秋戰國前善相者多若推祿命則盛于漢賈誼譏司馬  
 季主曰高人祿命以悅人心矯言禍福以規人財後世  
 又可知已今士大夫至田夫野老人：喜于談命故其  
 書滿天下清江鄉貢進士廖中伯禮連舉未第乃刻意  
 于此會粹數十家之說章分件析考驗得失較量深淺  
 成精記三卷携以示予：謂五行所寓有常焉有變焉



常易推也迹也變難推也理也自非心通意悟不足以  
盡此古稱善其事者莫如李虛中萬端千緒參錯重出  
學者就傳其法初若可取卒然失之茲豈易哉廖君歸  
矣苟因書悟理則將如由基之射百發而百中不然讀  
齊侯之糟粕其——否未可知也

題謝昌國式華堂記

淳熙甲辰今太皇太后慶七十于德壽宮推恩四海廬  
陵進士歐陽鉞字仲授以高年賜初品官其子碩取訓  
辭式華其老之言揭名于堂工部謝尚書錡實為之記  
歲星一周當慶元丙辰十月三日今皇帝奏上壽聖隆

慈備福光祐太皇太后冊寶于慈福宮聖算八十有二  
矣于萬斯年慶典未央鉞也又將增秩之寵載新斯堂  
以延賓客其有日矣是月壬戌平園老叟周某書

題廬山西林道場碑

右隋廬山西林道場碑文歐陽率更撰而不云何人書  
要當出于一手昔唐韋絢錄劉禹錫嘉話載率更行見  
索靖所書碑下馬布毯坐觀三宿而後去又云率更不  
擇紙筆皆能如志惟其好古如前說之勤是以肆筆無  
不臻妙理當然矣三門銘逸姓名亦知名筆也慶元丙  
辰十一月己卯平園老叟周某書



題裴晉公撰李西平神道碑

右裴晉公撰李西平神道碑以校江浙闕唐文粹本大率傳寫之脫謬且經改易不暇徧舉姑言其甚者乾元初立功武都邦人咸服具以狀聞而諸本畫作具狀以聞何俗弱也乘墉壑如通道殆有二義當謂士卒賈勇升高涉險如履平不然以而為如猶春秋書星隕如雨也今衆本直改作而通道或增一字為軌道于是下句砮臬獍而清宮亦添一禁字按周禮秋官砮蕞氏掌覆天鳥之巢鄭氏讀如擗碑蓋用此砮字而諸本畫改為磔尤更淺陋古書日壞俗本日多此予所以撫卷三

嘆也慶元丙辰十一月己卯

題歐陽文忠公跋賽陽山文

太和九年賽陽山文在集古錄第五百四十三卷自唐乙卯歲至本朝嘉祐己亥六賢同觀時蓋二百二十五年又至熙寧辛亥一紀之間文忠公已有存亡今昔之嘆後百一十五年為淳熙乙巳而亡友劉子澄記之今十三年子澄墓擯森然矣重可嘆也慶元丙辰十一月乙酉平園老叟周某書而歸之劉氏

跋歐陽文忠公與裴如晦帖

右歐陽文忠公與裴如晦帖如晦名煜慶曆六年魁南



省擢乙科嘉祐末以秘閣校理守潤州此公當時答書  
公文集書簡門先有嘉祐五年一帖而集古錄前漢雁  
足銘跋亦載如晦與公別幅至治平四年如晦以集  
賢校理判三司戶部勾院卒此帖藏紫薇朱公家作跋  
在隆興二年後三十三年朱公之子軫字叔止携以相  
示既刻附文忠公集又為記其大畧慶元丙辰十一月  
五日

題張志寧所藏東坡畫

蘇文忠詩云空腸得酒芒角出肺肝搓牙生竹石森然  
欲作不可留寫向君家雲色壁英氣自然乃可貴重五

日一石豈知此耶慶元二年十二月一日

跋老泉所作揚少卿墓文

同年臨江楊謹仲諱愿往為廬陵郡博士嘗為予言乃  
祖中大夫諱申在京師從老泉蘇公明允乞曾祖光祿  
少卿諱克從墓文又得王廣淵書丹時君卿篆額今有  
石本留先塋頗恨未之見也謹仲下世之十三年其長  
孫光祖始軸以求跋予生晚不知中大夫何如人然碑  
成于嘉祐七年秋而刻于英宗治平之初元是時三蘇  
名震京師廣淵直集賢院為群牧三司判官君卿自藩



却以藝文被幸由奉禮郎換內殿承制三人雖不同  
為當世所貴非中大夫好學而篤志則其文其書豈易  
得哉韓退之謂唐人欲銘其先必得三服予謂楊氏此  
碑非三難乎厥後謹仲以學行為鄉先生今諸孫又表  
而出之不隕其業將無愧于老泉之辭矣慶元二年十  
二月二十一日

跋宋待制暎寧軒自適詩

右徽猷閣待制宋公詩豪四十一篇皆紹興間寓鍾陵  
時投贈帥漕及與當世名勝唱酬也嗣孫文林郎江陵  
府觀察推官文成將伐石刻置家塾屬某一言惟本朝

承五季之後詩人猶有唐末之遺風迨揚文公錢文僖  
劉中山諸賢繼出一變而為崑體未幾宋元憲景文公  
兄弟又以學問文章別成一家藻俚而歸之雅正學者  
宗之號為二宋公蓋元憲曾孫字景晉名載詩序中東  
坡先生詩云吾觀二宋文字：照鱣素淵源皆有考竒  
險或難句後來邈無繼嗣子其殆庶此六語者今可復  
施之公壬午歲某在後省嘗草公贈官制云學知守其  
家亦此意也慶元丁巳正月戊戌前進士周某書

跋李先之禮記義



右章貢先生季公先之朴禮記義四首前兩道紹聖元年省元程文次兩道元祐八年監元程文是時兼用經義詩賦取士公賦已盛行于四方近德安府贛州刻公全集亦復收入獨經義不傳予幼從公族人養素處士學手自抄寫徃歲因吉水高君德懋留意是經命甥李驥騰本遺之今德懋之子誼攜以相示為題其後不然將莫知其為誰之文也

跋陳剛中石村廟詩

陳剛中字彥柔胡忠簡公同年進士其貶安遠宰也予適在贛識之豐肌便腹骨不勝肉而安遠荒僻瘴癘特

甚汲水置器中須臾墨色以故仕者多死士大夫固憂公不能生還未幾果然其後湘中有著紹興正論者公姓名在焉且云其妻無所歸削髮為尼未知信否謂公以辛酉歲貶則誤矣當以庚申為正

跋臨江軍劉昌詩祈父青詞稟

眉山唐子西父病篤母史氏祈以身代死已而母死父生彼特伉儷之情爾或不容于兩全若劉氏兄弟則孝于事親也其感格宜哉

題胡邦衡侍郎撰胡從周寺丞誌文

金昆玉友無復二難鴻筆瓌辭有華三絕繡篋中之遺



蹟附宰上之豐碑解白墮之嘲倏焉隔世圓朱褒之夢  
恍若平生偉詩禮之傳芳森兒孫其競爽尚襲藏于手  
澤期光紹于寶章白墮朱褒皆一時實事

題張魏公與晁升道帖

右魏國忠獻張公遺晁升道十四帖其半親表也升道  
諱升之南渡寓盱江寶文閣學士劉弘道資深見而奇  
之薦于魏公自是為公客公居潭連音問不絕凡國  
太晚年之起居欵夫早歲之學識皆于辭翰中及之最  
後謂人事無窮與天地相終始欲其撥置以全精神期  
之者至矣今公季子龍閣尚書開鎮豫章希父兄之勲

升道之孫子毅携公手澤往候祭戟因為記其本末慶  
元丁巳十月丁丑

題呂紫薇與晁仲石詩

晁氏一姓文獻相續殆無他揚號本朝盛族仲石諱公  
慶紹興初與范頤言魯裘父同學詩于呂紫薇故得是  
詩乾道元年平江守沈公雅刻紫薇集二十卷以歲月  
為先後此篇在末卷中蓋暮年所作也仲石之子毅  
以示周某敬書其後慶元丁巳十月丁丑

題李龍眠山庄圖

龍眠居士博學嗜古志尚清遠筆端餘力溢而為畫王



荆公雅量之數贈以詩又從蘇黃諸公遊蓋文與可一  
等人也龍眠山庄圖匹休輞川張右丞達明雁峯談錄  
云正本為中貴梁師成取去今所臨摹蓋初本也居士  
出處具蔡啓所作誌文一子諱碩字天老湖南提舉常  
平是生四子予識其二長諱琥字西美通敏善議論終  
于郡倅季曰瑜字季周嘗為理掾能傳乃祖筆法予屢  
得之今亡矣西美之孫谷出此軸請予題其後慶元三  
年十月壬午平園老叟周某

跋張魏公與彭子從書

尚書即彭公子從德厚如璞玉歲寒如喬松紹興癸酉

守零陵郡故相張忠獻公謫居在烏鵲誠盡禮不以燥  
濕改其度已而按刑交廣總賦沔鄂當時士大夫皆謂  
用未極也今觀忠獻帖其賢可知若子若孫俱守家法  
雖由積善使然亦忠獻相勉為學擇師友之助也慶元  
三年十月日

題陸本益齋記

乘成兄為陸本仲因作益齋記其論損益之義詳矣仲  
因復求予跋殆難措辭抑聞之蘇文忠公為學務日益  
此言當自程為道貴日損此理在既益請以是詩為齋  
之銘立爾常心毋欲速成惟直諒多聞之是親可以致



身可以揚名豈止一第而已慶元三年十月日

題周洽所藏南唐牒訴

右南唐吉水縣鄉貢進士周洪誼牒訴七幅考之史氏  
五代僭偽諸國獨江南文物為盛然每歲科舉取人甚  
少多用上書言事拜官惟廣順二年始命江文蔚知貢  
舉放進士廬陵王克正等三人而止雖舉子以少為貴  
然鄉坊保甲父子難乎俱免累改縣判如此蓋優之也  
家傳二百四十年八世孫洽來求跋語按周顥德五年  
歲在戊午即李璟保大之十六年方改元交泰而世宗  
盡取淮甸畫江為界上下震懼謀徙豫章已而削去帝

號奉周正朔故第一幅稱顯德六年越明年庚申太祖  
皇帝受禪辛酉璟南徙而殂煜嗣位于金陵後十三年  
歲在甲戌王師弔伐明年乙亥國除士民始避本朝廟  
諱其名上一字適同宣祖又明年十月太宗皇帝即位  
其下一字復犯御名故前牒皆名弘義最後一牒乃改  
洪誼實開寶九年之十一月至十二月則改元太平興  
國矣先是公私狀式例以牒件謹牒為文元豐四年十  
一月詳定官制<sup>所</sup>重<sup>新</sup>頒定式此其所以異于今也洽字季  
宏不隕世業豈但遺蹟是藏固將起家以大其門老夫  
雖耄尚或見之慶元丁巳冬至日



題浮雲居士魯達臣雜志後

姓氏書魯氏望廬陵本朝大江以南清源南豐兩族皆  
出宰執侍從嘗通譜系其後贛之雩都則叔夏尚書天  
猷吉甫侍郎兄弟繼為禁路之英惟廬陵一族文獻相  
承登科無慮數十人而未及三郡之顯今浮雲居士達  
臣有博古通今之學偶遺于科舉有知機應變之才不  
白于功名緒餘著書追跡前輩向使盡發胸中之所蘊  
其成就宜如何哉是生諸子才學俱茂或仕于小官或  
貢名天府而仲氏無逸策第太常典中秘書為尚書郎  
群從攷：為善方競奕迭興而未艾視前三家何患不

及特時有先後爾况猶子無玷嘗以奉使朔方假大雨  
制歸而勸講修注備膺寵章是固為之兆矣姑少徐之  
慶元丁巳冬至日

題至聖文宣王三十八代孫孔仲良唐貞元以  
後告身石刻

自古推尊孔子莫如孟氏既答公孫丑曰自生民以來  
未有孔子也又引宰我子貢有若之言曰夫子賢于堯  
舜遠矣生民未有句言至再三蓋然之也趙岐乃謂前  
聖不得相踰門弟子之言太過是豈知孟子之意哉及  
唐韓愈謂天子至郡邑通祀孔子北面拜跪禮踰社稷



彼堯舜雖得其位而不得常祀社稷雖得常祀而無天子北面拜跪之禮故云不得位而得常祀無盛于孔子是為遠過堯舜之効然後孟子之意明矣其竊謂虞賓三恪隨運推移孰有世襲封如衍聖公者陽城蒼梧間置守冢孰有廟宅世祀萬乘臨拜如孔林者以此推之將歷千萬世與天地相為終始何但生民未有而已今莆田幸因賢者為更版籍立四十九世孫之戶刻唐告于縣齋他日良二千石或能推擇嗣人世居學宮使先聖苗裔益勸毋怠予以彰皇朝崇儒重道之美又盡善也慶元三年十一月日

題俞洪所藏滕元發與俞退翁詩

四朝國史于遺逸中立俞退翁傳大槩用孫莘老所作墓表惟自西川召為御史力辭不拜墓表但白以闕員召傳乃謂至介甫藉其清望使擊故老夫清德安肯妄發介甫用人寧不察此竊疑滕元發嘗倅湖州退翁郡人熟知其賢觀所贈詩帖即可知矣當熙寧元年神廟待元發方擢為中丞必舉臺屬退翁之名或以其薦是歲十二月元發改翰林明年春介甫得政素惡元發出之于外知幾而退是乃所以為退翁况舉主補外自應隨罷耶墓表不書其由莘老亦嘗攻元發故也慶元



丁巳十一月望退翁元孫洪相過出示元發詩翰妄意如此來者或有考為退翁子孫甚盛是則豐積畱取之報洪醞藉疏通稱其家者也

再跋退翁溪堂集首詞並同其後畧有更改附錄于

下

又書溪堂集後

四朝國史于遺逸中立俞退翁傳大槩用孫莘老所作墓表惟自西川召為御史力辭不拜墓表但云以闕員召傳乃謂王介甫藉其清望使擊故老夫清德安肯妄發介甫用人寧不察此竊疑滕元發嘗倅湖州退翁郡人熟知其賢觀所贈詩帖即可知矣當熙寧元年神廟

待元發方厚擢為中丞合舉臺屬退翁之召必以其薦是歲十二月元發改翰林明年春介甫得政素惡元發出之于外知幾而退是乃所以為退翁况舉主補外自應視以為去就耶墓表不知其由莘老亦嘗攻元發故也退翁子孫甚盛且多顯者今其元孫激入為廷尉屢更麾節純誠厚德克世其家因示溪堂集附此說于後使來者有考焉慶元庚申二月己卯

平園續稿卷第七 終







則將與國咸休永世無窮矣慶元丁巳十二月

跋撫州游祖武禊帖

某與家兄子中自少喜收法書前後得右軍禊帖共以十數計此軸游氏所藏謝脫拘束而動容周旋如印泥無不愜當筆意變化妙入神品蓋傳于今者惟定武瘦本最佳此其一也慶元丁巳臘月丁酉

跋楊廷秀所作胡氏霜節堂記

清風嚴霜本不相為謀兼二美者竹也友人楊公廷秀平居薰兮慈仁真可解愠臨事則勁節凜然凌大寒而不改名堂作記曲盡竹之情狀蓋身之非假之也今胡

氏既知不可一日無此君其可三日不讀此記乎慶元丁巳

跋唐子西帖

眉山唐子西之文盛傳于世不待贊也史稱其論事精密通于世務為宰相張天覺所知歷宗子博士提舉京畿常平貶惠州數年歸蜀而卒有子曰文若字立夫一字仲懿寬厚秀傑文辭高雅不妄與人交而襟懷洒落人自愛之登紹興五年進士第屢被薦召多仕于蜀二十六年入為光祿寺丞遷秘書郎擢起居郎執政有惡其不下己者諷言官誣以事出知邵州改饒州除直敷



文閣徙温州三十一年叅知政事揚椿荐之高宗笑曰  
今不傲否蓋或言其簡伉也以宗政少卿召再為起居  
郎明年二月進中書舍人兼修玉牒官隆興元年以足  
疾求去正月丙辰除敷文閣待制知漢州明日改江淮  
都督府叅贊軍事符離退師例貶秩二等求出幕得昇  
州徙江州病丐祠二年某月卒于南康軍年六十晚號  
遜菴初為鄱陽破豪民一族人稱其政後與郡人王樞  
密剛中通婚姻卜居焉在朝廷若不與事間出議論輒  
正平無向背高宗將內禪懲靖康吳敏輩自以為功未  
嘗語人宰執亦不敢問獨立夫請對言不宜迫遽高宗

諒其忠與詳論舊事會御批追崇皇太子所生父立夫  
已書黃因過共嘆聖德不可及而疑名稱未安歸白宰  
相請更黃而堂使執不可立夫請不已宰相以聞改稱  
皇太子本生親尋詔侍從臺諫就御史臺會議遂稱皇  
兄而加贈極品其端蓋立夫發之立夫素主民兵或疑  
其迂雖予亦不謂然及守九江適虜騎犯舒立夫參用  
民兵備禦整暇方督匠刻東坡集人賴以少安其治郡  
能盡僚屬之才人皆樂為宣力至簿書期會則不屑性  
既寡合遇所喜形迹都忘平生不言人過雖有憾亦容  
之嘗曰觀人以初見為定往：十得六七少因讀史悟



性理宣州僧宗果果及與子西並游張天覺之名門震一時立夫適相遇于荆南先語其子云我今謁果彼若叩我、便不服果望見立夫遽曰尊公文章滿腹却欠此事君從何處得來立夫喜且服人兩奇之子輅字德輿亦能文進德壽宮慶壽古賦後省第入甲等乾道中由大理司直出通判漢州淳熙十三年冬提轄權貨務高宗上僂獻嘖議謂合稱祖破禮官之說又及巷市七日事孝宗下其議會御史察洪翰林邁首議稱祖非是洪家居待罪孝宗曰議禮如聚訟何嫌異同于是禮官併疏輅失言給事中亦乞罷輅復通判隆興府予嘗與立夫同

僚相善又惟文士子孫能世其家如唐氏者未易多得故傳其事于上舍游君所藏子西帖之後使修史者有考焉輅今為利州守慶元戊午正月乙卯

跋韓子蒼與曾公衮錢遜叔諸人倡和詩

崇寧大觀而後有司取士專用王氏學甚至欲禁讀史作詩然執牛耳者未嘗無人凡紹興初以詩名家皆當日人才也今讀韓子蒼與錢遜叔曾公衮等臨川唱酬略可觀矣或疑所以然予曰舉子在场屋為學不專為文不力既仕則棄其舊習難乎新功彼有志之士其操心也專其學古也力譬之追風籟雲之驥要非繩墨所



能馭故子蒼諸賢往：不由科舉而進一時如程致道  
呂居仁曾吉甫朱希真皆是也其又奚疑慶元戊午正  
月戊午

又

國家數路取人科舉之外多英才自徽廟迄于中興如  
程致道呂居仁曾吉甫朱希真詩名籍：朝廷賜第顯  
用之今觀曾公衮錢遜叔韓子蒼諸賢又皆翰墨雄師  
非有司尺度所能得也紹興初星聚臨川唱妍酬麗一  
時傾慕即之名勝游氏襲藏此卷有年數矣慶元紀號  
之四年歲在戊午上巳日周某子克謹題其末

跋蕭氏祖長官告

右武寧蕭長官所受淮南吳氏告一通按路振九國志  
楊行密之子渭自吳王僭號改文散官大夫為大卿御  
史大夫為御史大憲明年渭殂十一月弟溥嗣位改元  
乾真寔後唐天成元年也徐溫既死子知誥起復秉政  
其歲月職制皆與此告合予聞蕭氏自武寧起家至曾  
孫諱定基字守一本朝天禧三年登第嘗任侍御史風  
節凜然有孫諱服字昭甫元豐五年登第擢監察御史  
時相蔡京憾執政劉逵背已窮治逵姻家章氏私鑄獄  
於平江久不能決昭甫奉詔審鞠不如京旨遂坐廢錮



後起為吏部員外郎出知蘄州卒再世以直諒聞號廬陵名族祿仕不絕武寧七世孫武陵丞諱許字嶽英才其遇人予嘗與之游諸公方欲薦用俄謝事去議者惜之因其子特起出示祖告併題于後慶元戊午上巳

跋蕭御史殿試真卷

右天禧三年蕭公廷試三題卷一日之間文不加點頃在館閣同僚許克昌狀元出其從祖安世治平四年魁卷與此畧同蓋祖宗時士人業精于勤往々習貫如自然非若後來之鹵莽也家狀曾祖霽不仕而其裔孫尚藏淮南吳乾貞中任武寧縣令真告豈以為偽官故不

書耶或疑賦原韵不當押業之法按廣韵入聲三十一洽與三十二狎通用三十三業與三十四乏通用自唐迄天禧皆然此舊韵也仁廟初詔丁度等撰定集韵于是移業為第三十二而以狎之附之此今韵也慶元四年上巳

跋宋運判 晒奏稟

右故廣西運判宋公奏章四藁公以紹興二年二月為衡陽太守當孔彥舟馬友曹成諸劇賊破城侵境之後黎庶凋瘵百孔千瘡官軍征戍日夜往來資糧靡屨應酬無虛日而能悉心撫摩臨事整暇奏課遂為湖南第



一四年三月代還此陞對所陳也如乞諸郡置將乘時  
和糴與夫鞭策諸將早圖恢復皆中興急務深契高皇  
之心畀以使節將試用之攬轡踰年奉詞遽歸没于臨  
川二子：伋子倬仕皆弗顯其孫文祚等得此遺墨俾  
某識其後公之守衡也舅氏王公藉寔貳郡事奉外祖  
母衛國太夫人在焉又叔父靜江府君侍祖母秦國夫  
人宰屬邑之安仁某時年七八歲侍先夫人省秦國于  
衡尚能記公之政今追書大略如此公諱昞字景融蓋  
鄭國元憲公曾孫而外祖母之姪于先夫人為表兄云  
慶元戊午三月十七日

跋張忠獻公與外舅帖

張忠獻公忠君憂國勸學為善之心造次顛沛未嘗少  
忘凡見手書者皆是也近世浮辭繆敬盈于尺牘觀此  
得不見賢思齊乎茲八幅者外舅御史王公彥光紹興  
庚辰守公鄉郡及移瀘帥答書也德人士風之衰期待  
甚厚蓋聞名于過平江之日知非溢美外舅季子嘉賓  
藏之有年今傳其子紹祥而屬某題其後慶元戊午五  
月庚辰

跋義靈廟碑

義靈廟者滕侯棲神之所也侯宣和間據天台適方寇



鷓鴣張初為曲突徙薪之計後收焦頭爛額之功正使二千石智勇過人未必兼此二者孰謂一戶曹乃優為之當時祠享永世廟食宜哉慶元戊午五月丁巳

題聶倅周臣所藏黃魯直送徐隱父宰餘干詩

藁

山谷此詩今載外集不觀初草何以知後作之工老杜云陶冶性情存底物新詩改罷自長吟孰知二謝將能事頗學陰何若用心苟作云乎哉慶元戊午歲戊午月戊午日平園老叟周某書而歸之聶氏

跋江氏舊書

右安陸江氏書一卷頗有誤字首印江元叔書籍記末用越州管內觀察使之印不知元叔守越時錄本或錢氏舊書也子孫不能守多入鄉人翰林學士鄭獬毅夫家贛州興國主簿余鏞得此以遺予乃錄毅夫鄖溪集所載記文于後慶元戊午歲戊午月戊午日

跋黃山谷書唐人詩

右山谷大書一軸紹興末外舅御史王公彥光守漢或帥瀘時得之今將四十年其孫紹祥携以相示昔山谷謫居多作字以遺蜀人中興後凡東南士大夫之為監司郡守者往往有所獲而歸歲月既久遇其良輒取之



郡無留良烏詩不云乎尚有典刑慶元戊午五月十四日

跋張芸叟劉滄詩

右浮休張公劉將軍墳廟詩一首將軍諱滄慶曆名將力戰城水洛蕃漢皆畏愛幾為狄青尹洙所害故云生前毀譽豈堪聽身後功名始汗青此詩雖載畫墁集亦潛其名故表而出之慶元四年六月旦張公曾孫繼祖携以相示為題其後

跋司馬文正公手鈔富文忠公使北錄

司馬文正公手廣記備言不啻饑渴之嗜飲食况國家

重事乎富文忠使北語錄首尾萬有餘字手自抄錄他人安能為此淳熙癸卯公曾孫吏部侍郎季思刻石泉南屬其題其後今十六年而侍郎之子遵求踐宿諾感歎不已某昔為太史牛馬走恭讀徽宗實錄宣和六年春既獲夔離不得慶曆國書誓書真本藏寶文閣朝廷以為快祖宗累世之憤則富公奏牘所謂影帶下策蓋用之矣當時力辭奉使賞抑有由也慶元四年六月十一日

題東坡上薛向樞密書

薛恭敏公元豐元年九月自樞密直學士工部侍郎知



定州召入西府蘇文忠公昔嘗與之論天下事今復貽書深切著明如此責善為有加矣薛本以理財論兵進及在政路首尾三年同列質以西北事則養威持重未嘗啟其端最後詔民蓄馬既奉行復欲反汙為舒亶論罷聞義能徙不善能改未必不因蘇公之書比夫患失遂非者有間矣元祐間特被褒表豈無所自耶公作此時年四十三是日其生朝也身為二千石士民當盈庭為壽否則與家人飲食燕樂乃齋心呵凍極陳國計其賢于人遠矣官本不載此書于集惟麻沙本及別集有之故人劉籤壽史君之子宗奭兄弟家藏真蹟慶元戊

午七月旦以示前進士周某敬題其後

跋楊廷秀贈族人復字道卿詩

江西詩社山谷實主夏盟後四方人材如林今以數計未為多也誠齋家吉水之湓塘執詩壇之牛耳始自宗族延及郡邑孰非闖李杜之門希歐蘇之蹤者粵無鍾燕無函秦無盧胡無弓車夫人能為之尚可以社名乎家生執戟郎又拔乎其萃者也慶元戊午七月二日

跋曾氏兄弟帖

贛州曾氏兄弟俱有時名其以文章議論致身禁從者三顯謨學士字叔夏寶文待制字天猷敷文待制謚文



清字吉甫建炎紹興三十年間並歷春官長貳可以知其  
其人矣文清公二子大理卿字原伯戶部侍郎字仲躬  
同事孝宗克續先業視南豐之曾殆庶幾焉仲躬子德  
廣守桐州哀兩世翰墨刻之石蓋將對手澤而思永君  
子之澤即心畫而推廣前人之心濟美象賢寧有既耶  
附以呂伯恭禮部君二帖深有益于學者乃知五公義  
方之教施及宅相何其盛也慶元戊午八月丙寅朔

題呂侍講希哲歲時雜記後

本朝承平歲久斯人安生樂業凡遇節物隨時制宜雖  
古有今或雅或鄙所在不同然上而朝廷次而郡國下

逮民庶靡虞熙洽未嘗虛度則一也侍講呂公當全盛  
時食相門之德既日擊舊禮又身歷外官四方風俗皆  
得周知追記于冊殆無遺者惟上元一門多至五十餘  
條百年積累之盛故家文獻之餘茲可推矣慶元戊午  
秋公之元孫仙遊邑大夫祖平以示平園老叟周某竊  
有生晚不及見之歎云

自題與黃談書尺

元祐給事中黃公夷仲之曾孫諱談字子默山谷先生  
從孫寔傳詩社之正印有文集三十卷自號澗壑居士  
早受知於胡明仲侍郎其後劉共父樞密張安國舍人



繼帥湖南皆為上介屬以文翰人門具美宜在朝廷而  
官止權務壽不及知命識者惜之嗣子早世其孫鈞以  
子隆興乾道間往復之書數十通聯為大軸銜袖相過  
內十四幅乃予手筆餘皆弟姪及筆吏代作今三紀矣  
追懷人物之英豈易復得重為嘆息慶元戊午九月己  
亥

跋撫州鄔處詩

臨川自晏元獻公王文公主文盟于本朝由是詩人  
項背相望近世如謝無逸幼槃兄弟及饒德汪棖信  
民皆傑然而拔出者也南渡以來又得寓公韓子蒼

呂居仁振而作之四方傳為盛事其後儒冠則曾季狸  
裘父釋氏則文慧大師惠嚴道士則黎道華師侯同時  
以詩名鳴人喜稱之今鄔君文伯復以科舉餘力刻意吟  
詠索其新舊藁遠以相示予雖不能詩然亦知其佳作  
也蓋木有本可以干霄水有源可以至海以君之才進  
而不已追前人而與之齊斯無難矣慶元戊午九月戊  
申

跋山谷草書太白詩

南豐譔氏收山谷草書李太白歌行一卷殆中年筆也  
予家藏數卷亦太白詩蓋非謫仙妙語不足發龍蛇飛



動之勢耳今江西豫章廬陵宜春皆刻山谷真草惟蜀  
中劉氏十卷中草聖尤奇寔暮年筆也始穎昌劉昱字  
晦叔與山谷友善暨其子瓌孫伯虎三世相繼持節于  
蜀日夏月聚固宜得之富其間二說學者不可不知  
乃命小史錄于左慶元戊午十月丁亥

題戊午歲吉州舉人期集小錄

選士于里登名天府為之首者期集同舉之人禮也廬  
陵號士鄉故此禮尤盛而今歲特盛焉求新左君淳熙  
己酉夏然居萬人之上今秋克復舊物而其父母年方  
五十餘二者皆近所稀有其盛一也誠齋楊公龍泉孫

公朝廷鄉黨之達尊交以序美之其盛二也每舉士或  
有故不至或不多者什僅三四今在座乃五十人  
其盛三也左君既具著于錄而附以坐客所賦詩強予  
題其後老詩雖不能措辭竊有祝焉國朝天聖八年春  
參政歐陽公以國學首荐冠名南宮是年廷試榜眼則  
丞相劉公其後禹甲則侍郎郭公中興第五則資政胡  
公至紹興十八年參政董公遂唱名第一其他登甲科  
者猶未悉數也諸君勉旃踵前賢之高躅增吾邦之盛  
事其在茲行乎慶元四年日南至

跋張如瑩歸去來辭



永嘉陳開祖紹興二年登第張公子韶雅重之仕至廣  
德太守行誼表于一鄉廉靖著于仕途其倅豫章戶部  
尚書張公如瑩以慶遠軍節度使來為連帥素以翰墨  
馳聲位望既崇益自珍貴人欲其尺牘不可得獨為開  
祖書歸去來辭于畫卷且推美其古雅今五十年而開  
祖之子求仁請余為之跋求仁三為劇邑以名字再典  
郡予嘗同僚知其端諒通達益名父子也開祖諱一鶚  
求仁名自修慶元五年正月十九日

跋王才臣十史論

淳熙中予脩敷政府故人劉子澄守衡言布衣劉德老  
之才學孝廟亟命以官食衡祠祿因思予友王才臣才  
學不啻德老甚欲以名聞顧念才臣春秋未甚高猶當  
以科第進遂不果後歸老里中才臣猶在場屋偶見孫  
從之跋其史論為之悵然才臣身雖益困而所養益厚  
異時會當有知之者予老矣尚庶幾及見之慶元五年  
上巳日

書譚該樂府後

世謂樂府起于漢魏蓋由惠帝有樂府令武帝立樂府  
采詩夜誦也唐元稹則以仲尼文王搯伯牙水仙操齊  
牘沐雉朝飛衛女思婦引為樂府之始以予考之乃賡



載歌薰兮解愠在虞舜時此體固已萌芽豈止三代遺  
 韻而已新喻譚該居之舉業餘暇作上之回等十四篇  
 因舊題而衍其辭用意深遠至于擬古詠史詠懷感遇  
 諸詩多有佳句進而不止前輩可以企及為題卷末而  
 勉之慶元己未五月戊戌  
韓文公集云雉朝飛牧犢子  
 作吳兢樂府古題要解以為  
 處士犢木子劉次莊樂府  
 集又作牘沐未知孰是

跋宋景晉煥手書佛經

待制宋公手書金剛經端謹有法度始末一體如摹印  
 然敬之至也王荆公學王濛書多為橫風疾雨之勢每  
 作帖初尚矜持後必坦率惟寫佛經專用楷法亦是理  
 欵公以紹興己未五月書此其曾孫曾老以慶元己未  
 五月示周某甲子適一周矣

題趙清獻公三帖

右趙清獻公三帖第一乃嘉祐八年春任度支副使所  
 作其云孫公勇退謂蜀人文懿公也名與公同尋除東  
 宮三少致仕岷公長子是年登科第二則治平二年公  
 知成都時仁舉不知謂誰三年有都官郎中廣濟河催  
 綱石輅為梓州路運判或斯人欵第三云呂侍講三請  
 留司蓋正獻公也是年八月出知蔡州慶元五年十月  
 旦平園老叟周某敬題



題揚廷秀新塗胡氏義方堂記後

誠齋作義方堂記理勝而文雄殊無老人譎諄衰弱氣象吾黨所共矜式豈特光賁胡氏家塾而已慶元己未十月辛未

跋東坡與張近帖

右坡公與張幾仲帖蓋元豐間謫黃時也所謂授德興尉者長子邁也其將自黃移汝嘗賦長篇以銅劍易幾仲龍尾子石硯幾仲作詩送硯反劍公又屬和卒以劍歸之具載集中幾仲名近仕至顯謨閣直學士國史有傳其從孫子侑家臨江軍寔藏此帖慶元己未十一月

甲辰周某子克敬觀

平園續藁卷第八終



平園續藁卷第九

周益文忠公集四十九

題跋四

大元帥康王與向子諲咨目及御筆等跋

臣竊惟靖康大變地裂天傾汜塵已蒙鄙壇未設餘分  
 閏位人懷向背惟世臣向子諲首符所部拘偽楚之族  
 教遣行人及仲子澹詣大元帥府議軍國事領兵戡難  
 見褒璽書謹重嚴備復勤親扎此權發運副使時也胡  
 行鬼速漢箭無神金城湯池所在宵潰江湖諸郡送款  
 相望子諲獨鳩叛餘之兵嬰十里之城八日然後失守  
 汪藻撰撫恤官吏軍民勅書有曰明于分義屬此艱危



巧說百端堅持一意力為巷戰奮以忘軀此還長沙時也御書薊林泛宅古文孝經臨蘭亭序拜賜不一此為浙漕時也國步已安春秋猶盛禁途輔郡倚注方濃上書請老留之不可特頒詔諭遠比漢疏侍從挂冠鮮有是禮此守平江時也向非忠誠慷慨心在王家終始不渝安能致上眷如此雖疾風草勁向日葵傾聖鑒昭：屢形獎飭然責賢必備求全或毀時當多故傳聞異辭其孫士虎懼後人猶致惑也敬裒奎畫刊之樂石謂臣昔以太史牛馬走逮事高皇俾書下方或可傳信恭惟一字為褒崇于袞服衆言淆亂折諸聖人今觀天文議

論定矣慶元六年二月旦具位臣周某其謹書

跋朱元晦所作南城吳氏社倉記

某遭遇孝宗皇帝陪貳府者十年每歲必聞宣諭云朕自中春農事興即憂水旱直至十月米穀上倉然後放心洋：聖謨二帝三王所未有也方社倉畫旨時某在東府實奉宣德意下之有司今南城吳仲吳倫兄弟請書此記并敬載聖語于後當有告于太史氏者其位周某書

跋山谷題橘洲畫卷

橘洲在湘江中巨浸不能沒膏潤宜橘以是得名唐張



曲江杜子美劉夢得皆見于詩又畢田序云橘千餘本  
民居數百家佛刹神祠馬氏書堂詰盜官舍在焉張舜  
民記洲南北與州城等有巡檢寨及僧寺兩三所漁者  
數百家予比歲嘗至其上不復曩時之盛今觀山谷所  
題畫卷亦似疑其畧也橘訣律切吉激質切本作兩音  
北人混而為一故酈道元注水經橘洲或作吉字近世  
偽傳東坡綠橘傳亦指為吉五方音訛多此類予以舊  
游故詳記之慶元庚申二月乙丑平園老叟書而歸之  
趙仲肅

題東坡晚年手帖

東坡以靖國辛巳北歸五月由金陵過儀真二十九日  
手簡別發運司屬官六月自潤還常州七月仙去此乃  
數旬前帖尤可貴也趙仲肅以示周某敬題其後慶元  
庚申二月乙丑

跋歐陽文忠公與張洞書

右歐陽文忠公與張洞手書五幅洞字仲通開封人晁  
无咎鷄肋集有傳任潁州推官文忠實為守甚重之皇  
祐三年從晏元獻公辟于長安文忠時守南京答第一  
第二書其送行長篇今載居士集第五卷明年文忠丁  
母憂歸潁答第三書至和元年洞以大理寺丞再從晏



公于西京而文忠初服闋還京師答第四書嘉祐六年  
文忠在樞府而洞以秘閣校理出守棣州答第五書次  
序皆可考其後又為三司度支判官歷江西淮南轉運  
使官至工部郎中治平四年卒此帖藏玉山汪季路家  
慶元六年閏二月己亥

書馮頎自得集後

紹興辛巳三月予任秘書省正字被差克公試補試類  
試考校官時仁和縣丞馮頎子長來主管試院諸司開  
院與之款偉岸而文自言系出文懿公意甚竒之蜀人  
劉詔美侍郎負才擇交亦稱之不容口後二十餘年君

為朝散郎京西安撫司參議官出所著書三卷名曰自  
得上論經旨十六事中為史評二十二下則詩話四十  
六其推明聖賢之意考訂古今之說往：出人意表今  
詩匠揚廷秀待制嘗序君詩謂清麗入江西深長幾唐  
人則學問文章從可知矣年八十而終慶元庚申春其  
子從政郎有年自循州理掾奉母還嚴陵過予話舊感  
嘆不已書此以遺之慶元庚申閏二月丁巳

跋黃魯直帖

山谷以紹聖元年冬坐史事安置黔南二年四月至焉  
其年三月朝奉大夫錢塘韋驥字子駿來為夔路提點



刑獄嘗任主客郎官故云子駿提刑主客大夫四年三月宗正丞張向除本路提舉常平實山谷之外兄乞避親嫌十一月移戎州五年六月改元：符方抵貶所其云從道者向也此十帖皆與驤者是歲九月驤移知亳州未上易四明本名驤皇祐五年登第後避濮王諱改烏臨江有文集蓋其孫作守時刻之慶元庚申三月戊寅書而歸之汪氏

跋蔡君謨與唐詔帖

右蔡忠惠公與唐詔帖十二紙詔字彥範龍圖閣待制肅之子侍讀詢之弟錢唐人其云厚之新得書蓋指浙

西轉運使元絳此至和二年公守泉時又云清源若移動謂自泉移福及再知泉州時打探過歲則嘉祐五年召入翰林知開封時也皆當置之卷首文字繁冗帖累辱降訪帖前日偶出帖乃嘉祐六年四月權三司使以後所作按仁錄是年八月以江東運判尚書比部員外唐詔為權發遣三司開拆司十月改權發遣監鐵公事殆公所辟置耶詔之在職嘗經憂惱故公自言頃歲經由衢州因抱骨肉之戚至泉遂病以解釋詔使之入省仍勸其止市戶祭奠又每達老親之意于其家人可謂親密之至者也先後偶失序略為之辨而歸之汪季



路氏慶元庚申三月甲戌

書歐陽彞四世碑

古者官有世功則有官族著之譜牒百世可考雖然引而伸之存乎其人若樂卻胥原狐續慶伯之後失其先業則降在皂隸者多矣友人歐陽彞字元鼎世居廬陵郡之永和鎮今為族長儒學行義表一鄉其家世甚遠未暇徧舉姑以近數世言之贈奉議郎諱登字大明者高祖也左朝散郎通判澶州諱聚字景文者曾祖也祖諱環字粹明父諱襄字允成俱業儒允成少年貢于鄉游京師之太學不幸再世俱不及下壽肆其子孫日

以蕃衍與貢籍登科第者相望其興特未艾也自奉議而下墓刻多先達名筆元鼎既哀四世拓本聯為卷軸又取近族之隱德者登科者死節者別為一編于是歐陽氏之源流開卷可知傳不云乎世濟其美不隕其名此元鼎紀先烈詔後人之本意也乃為表而出之慶元六年三月既望益國公周某書

跋富鄭公與李中師帖

朱元晦跋云李事公不為不謹公待李不為不厚晚乃觀望時事以公同編戶出免役錢反覆如此



四朝國史李中師本傳言中師在河南治辦刻深厚結  
中人神宗嘗稱其治狀富公為相奏曰陛下何從知之  
帝默然中師平昔事公謹者望其荐已聞公此對勢應  
匿怨後與編戶同敷役錢聊以逞憾非但徇時而已公  
遇李厚于私觀或不能免上前減否自有公論違惜小  
人怨乎慶元六年三月甲戌

題所書劉辰告墓碑橫石

乾道庚寅秋予初直北門為同年辰告君作墓碑又屬  
兩同年朝士書丹題蓋今三十有一年而君長子贇暨  
兩弟耆孫吉孫請予別書此文欲以橫石刻置家廟義

不可辭贇即召孫也以夢更今名甚文而才克肖父祖  
自淳熙辛丑至慶元己未再上南宮立身揚名其在茲  
乎宜孫亦負僂聲嘗兩貢于鄉與于孫偕亡矣六年庚  
申五月旦某書

跋顏魯公書

真卿承命南采諸事草  
張貞不丁國事

但賊勢尚爾奈何  
可念真卿

右顏魯公帖凡四行二十六字或真或臨不能辨也第  
一第二行畫處各減一字惟公忠烈巍然千載猶有生  
氣况觀遺墨起敬謂宜如何按永泰二年歲在丙午公  
奏宰相元載抑塞人言甚于李林甫楊國忠載怒因公  
論祭器誣以誹謗二月乙未由檢校刑部尚書知省事



貶峽州別駕未至易吉州司馬所謂南來諸事互減一字正此時也先是漢州刺史崔旰陷成都蜀中大亂公貶後十九日癸丑紹興元帥兼劍南東川節度張獻誠就近討旰三月戰梓州獻誠大敗僅以自免所謂不了國事殆指斯人張真之下闕文疑稱其字蓋誠貞義相通耳初獻誠陷安史之亂將兵守汴後拒朝義以州來降與公俱奮忠義者故公賢其人念其敗云爾此帖當是公赴吉或到官所作自丙午歲距慶元六年庚申凡四百三十五年而臨川梁世昌寔寶藏之遠來求跋考唐史永泰無二年蓋是歲冬至改元即稱大曆元年至三

年八月公自吉移刺撫州六年書麻姑山仙壇記今年三月戊寅夜山之仙都觀大火焚蕩幾盡古杉星列亦隨飛烟衆碑皆斷裂雜瓦礫中獨公壇記端然其傍祝融回祿曲意護持如此故併記其異為後世忠臣之觀十月甲子周某記

跋張安國與弟伯子家書

士大夫尺牘施之尊貴未免矜持用之交游容或假借若乃行草得于肆筆獎勵發乎真情舍群從家問何以哉觀此五帖則故紫薇郎之墨妙今太常伯之蚤成何待贊也憶乾道壬辰夏道由池陽太常伯之尊君持節



在焉晤言累日其論難進易退學道愛人皆可書而誦也施及賢嗣立朝濟世美蒞官守家法義方之教有自來矣茲用表而出之庚申秋社平園老叟周某題

跋山谷書文賦

右山谷元豐壬戌歲年三十八宰太和縣書陸士衡文賦及半興盡而止以遺晁仲詢仲詢傳其親孫勝之尋歸廬陵王揚仁揚仁以遺太和嚴端禮端禮將刻置山谷舊治偕萬安郭澥求跋語昔王右軍距士衡屬耳已重其賦書之唐太宗時獨褚河南能辨右軍帖真偽愛而臨其本至國朝藏蜀中李翹叟家元符間山谷自黔

移戎見之謂豪勁清潤天下奇書益悟古人沉着痛快之語今觀此卷書法娟秀不減晉宋諸賢自足名世或乃疑山谷元祐以後每恨向來字中無筆遂謂四十年前書非其所喜殊不知前輩為學日益新而又新晚欲自成一家豈遽矜誇滿假是殆癡人前不得說夢也慶元六年庚申九月甲戌

跋柳公權赤箭帖

唐柳公書當時自九重至外夷無不受重史稱其結體勁媚蓋筆諫之意先形心畫此所以為貴亦猶魏元成忠直而嫵媚耶後世真蹟日少賴石刻僅存典刑予官



行都有朝士揚文曷蓄公碑三十餘種往：來自西北  
其在東南者山南西道修驛路記和州陋室銘贛州閑  
禪師碑台州國清寺額翠屏院天台佛三字題僧清觀  
簡及江州復東林寺碑耳東林近又煨燼或重惜之予  
笑曰趙明誠金石錄載何進滔德政碑在柳書中尤奇  
偉政和間大名尹磨去別刊新製厄會至此殆不若東  
林之一炬也太和蕭知節示赤箭帖求予一言夫顏精  
柳骨古有成說此帖字瘦而不骨露沉着痛快而氣象  
雍容歐虞褚薛不足進焉昔歐陽文忠公最愛高重碑  
以為摹刻之工鋒鋟皆在而蔡忠惠公則謂陰符經序

善藏筆鋒柳書之最精者二說正相反文忠每推忠惠  
善書而云論若此不同况晚輩寡學乎宜擇良工刻石  
傳之以俟識者微知節儒雅好事其孰能與此慶元六  
年九月辛巳

跋楊廷秀石人峯長篇

韓子蒼贈趙伯魚詩云學詩當如初學禪未悟且遍參  
諸方一朝悟罷正法眼信乎拈出皆成章蓋欲以斯道  
淑諸人也今時士子見誠齋大篇短章七步而成一字  
不改皆掃千軍倒三峽穿天心透月脇之語至于狀物  
姿態寫人情意則鋪叙纖悉曲盡其妙遂謂天生辨才



得大自在是固然矣抑未知公由志學至從心上規磨  
載之歌刻意風雅頌之什下逮左氏莊騷秦漢魏晉南  
北朝隋唐以及本朝凡名人傑作無不推求其詞源擇  
用其句法五六十年之間歲鍛月鍊朝思夕維然後大  
悟大徹筆端有口句中有眼夫豈一日之功哉吉水羅  
惠卿之子見示公石人峯長韵讀之如身履羊腸耳聞  
班寅心膽震悸毛髮森聳詩能動人一至於此耶予懼夫  
不善學者欲以三年刻楮葉之巧而希秋花發杜鵑之  
神望公將增竭履趨之非但失步却輟且將下墜千仞  
故歷叙公真積力久乃入悟門證子蒼之知言慶元庚

申十一月辛巳平園老叟周某書于華隱樓

題嘉祐賀老人星見表批答

宋元憲公五世孫梓示嘉祐四年正月仁宗朝批答樞  
密院官賀春分前老人星見表一通使副凡四人宋公  
為之長故子孫得藏當時之批答觀所續之紙高下正  
與表同乃錄某玉堂雜記附其後知南渡以來百司失  
舊制多矣梓云人多以無御寶為疑某告之曰詔書單  
賜所以用寶就批元表之後何必寶也梓請併書之慶  
元六年庚申十一月二十九日

題趙清獻公帖



儒書釋書雖異而欲人求放心復本性則同皆因其所  
有諄：然命之非強以外鍊也趙清獻公習與性成庶  
幾由仁義行宜乎造次必於是觀其與弟姪家問可知  
矣慶元庚申臘日平園老叟周某書而歸之季路汪氏  
題癸丑謝何同叔送羊羔酒詩贈尹德鄰

永豐尹直卿德鄰學富而瞻于文有能詩聲紹熙癸丑  
補中太學生兼試問寢龍接曉詩末句云書生憂國切  
幾白九分頭學官嘆服寘名第一謁告還鄉屢枉佳篇  
今將參學見索鄙句老諄無辭可措偶記頃在長沙有  
謝何同叔運判雪中送羊羔酒四韵後欲再賦以酒有

浮蟻可押慕羶對未成而止今錄舊作請直卿為足之  
若自有壓倒元白之句則九萬里風斯在下矣庚申臘  
月十七日

跋蕭氏敦節堂詩

徽宗朝名御史蕭服字昭甫吉水人坐不肯羅織吳門  
章縱私鑄獄拂蔡京意羈管虔州後起為吏部員外郎  
出知蘄州卒年五十八嘗遇恩封其父女奐字君保至  
通直郎所居有敦節堂本路提點刑獄張景修作詩美  
之此廬陵名士彭史君諱醇字道厚政和初和篇也踰  
九十年堂壞而詩存蕭氏以婦彭公玄孫叔夜叔夏池



飾藏之因為詳記本末按四朝國史蘄州本傳初謫處  
州今其玄孫祺出大觀四年印曆寔貶虔州虔與處字  
畫偏傍異爾即今贛州吉之鄰郡近世既改虔為贛史  
官不考耳嘉泰辛酉四月辛巳

跋陳瓘書

張文潛謂韓文公揭陽謝上表頌德近諛此非知言古  
人愛其身以有待不欲死瘴癘耳其後為兵部侍郎宣  
撫鎮州甲士陳廷大聲數責賊帥視死為何如今伯紀  
謂陳忠肅公跋敢疑論為惧死時語亦非也蔡氏烈焰  
燎原燕天乃直犯其鋒雖被竄斥辨論不已惧死者能  
之乎忠肅存心吾知之矣私史廢而宗廟尊朝聞夕死  
可也嘉泰元年四月壬辰廬陵宰黃伯庸以示邑人周  
某敬題

題山谷書大戴禮踐阼篇

大戴禮踐阼篇學者罕讀東坡妙語聞所未聞山谷翰  
墨世共寶之可謂三絕太和彭惟孝字孝求好古嗜學  
謀刻之石頗疑元祐甲戌四月改元不應仲春先云紹  
聖竊意山谷或以仲夏書此誤作春耳六一先生集古  
跋謂鍾繇賀破關羽表當在漢延康庚子春乃作己亥  
閏十月唐羅池廟碑據書撰官當在長慶三年乃題元



年立石世既盛行姑俟識者予于此亦云嘉泰辛酉四月丙午

題鞠城銘

李公麟字伯時堂弟棠字德素南唐李先主昇四世孫並登科隱舒城龍眠山里人李冲元字元中少年邁往善論人物如壁共為山澤之遊號龍眠三友元祐三年亦登第典獄宜春作鞠城等十一銘其賢可知汪公涓字養源被遇孝宗歷左司諫中書舍人蓋吏部尚書諱應辰字聖錫之兄嘗為吉椽喻公子材為書此銘五十二年矣子材即聖錫婦翁諱樗紹興初擢館職後宰懷

寧避時相挂其冠晚起為郎久之再致仕今其孫珪來為酒官兼行椽事參前手澤服膺法戒矜式賢範謂予昔與乃祖及江氏兄弟皆厚善請題下方詳記以告來者嘉泰辛酉四月丙午

跋張子韶與陳朝彥序詞

張公子韶以布衣奉天對氣節凜然既登近班不改厥度久竄庾嶺之陰所養益厚益剛者也其告同年富沙陳朝彥及引揚中立溫柔寬厚之教以煉金為喻朝彥剛正抑可知已學者讀蘇文忠公剛說于此不能無疑予謂二者皆是也舜命夔教胄子曰剛而無虐臯陶告



禹曰剛而塞洪範曰沉潛剛克高明柔克蓋天為剛德  
猶不干時况在人乎彼無禮不可治民如子玉者不學  
其蔽也狂如言六者壹之而不沒如陽處父者或虐或  
塞或不知克之過也子韶所戒其在茲欤若蘇氏則明  
言剛者必仁夫人至于仁剛不勝用矣不仁必害物焉  
得剛予故曰二者皆是也朝彥諱廷傑紹興癸酉自南  
康宰辟廣西經略司幹官子韶時在南安以序及長短  
句送之乾道丙戌朝彥嘗除司農丞未上而卒其子希  
黯為廬陵郡督郵出子韶真蹟敬題其後嘉泰辛酉五  
月朔

跋養正堂記

右冀州養正堂記并與魯侯帖山谷為北京教授時所  
作年方三十五自云比平時書札似差老勁明年調太  
和宰秋歸江南真積力久詞翰又非前比所謂九萬里  
風斯在下矣淳熙元年五月晦周某觀于宗人虞卿兄  
弟家

後二十八年歲在辛酉再觀此卷恍如隔世徒有波  
斯匿玉之嘆嘉泰改元六月癸未某書于平園明農  
堂時年七十六

題李彥平遺書後



孔子曰朝聞道夕死可矣是理也載于易繫辭雜出于禮經三代時佛教未入中國儒者于啟手足之際往不亂此理素明也及漢晉以後釋教始行乃謂欲達死生之理非潛心釋氏不可故好之者心溺攻之者辭費益亦反其本而已予與樂菴李彥平既親且舊知其非逃儒而入釋者臨終超然自在如此殆聞道乎其子嗣宗等屢求一言發明遺訓敬題其後

跋曾無疑所藏二帖

范忠宣公心正氣和道全德備三復尺牘如見其人嘉泰元年七月癸丑周某敬題歸曾氏

予家藏石曼卿大書籌筆驛詩宛類顏魯公心畫今友人曾無疑又示其行草二十字絕似柳誠懸范文正云曼卿之筆顏精柳骨諒哉嘉泰元年七月癸丑

題南魯夫集序

魯公提舉生二子長伯和諱塤次仲和諱篋伯和生彌泰有子曰寅亮予既畀公集序今仲和之子曰瓌曰璉來求別本復書以遺之嘉泰元年歲在辛酉八月戊子某題

跋劉氏後隆堂詩

唐末揚行密奄有江淮國號吳吉其南境也郡人彭玕



素強暴擅行郡事以兵屬永新劉公景洪欲挈城附湖  
南馬氏公陽諾而寔不從玕獨携部族奔楚邊陲晏然  
公不有其功退隱山林南唐既受吳禪厚禮招聘亦不  
應常曰吾免二國交兵活人多矣子孫當有隆者名其  
北山曰後隆生子諱煦之子諱素是生相國諱沆字  
冲之仁宗天聖八年進士第二人至和中拜相累贈曾  
祖太傅祖及父皆太師其居相位每務進賢歐陽文忠  
公在侍從被譖出守公方提舉修唐史密奏留置史局  
尋遷翰林學士今某藏富文忠公與公手書云每辱勉  
以盡瘁鎮靜有所植立其如五年無補雖強自勉恐終

負教誨北望恩館神爽飛越富公書辭如此公之薦進  
可知達賢者宜有後故其子諱瑾字元忠孫個字寬夫  
仕皆至待制三世貴顯歷事五朝後隆之名茲驗矣初  
相國兄弟四人其季贈金紫光祿大夫諱注生知蘄州  
諱璞蘄州生知大庾縣諱伸大庾生宜都令諱守柔字  
光祖復以後隆名先瑩之新堂玉山汪端明聖錫桐鄉  
朱紫薇新仲廣漢張左司敬夫莆田鄭省元叔友鄉人  
資政胡忠簡公及王敷文民瞻揚待制廷秀而下皆為  
賦詩光祖之孫子純出以示予懼來者未詳知也故推  
本末遺之子純嘗舉于鄉進修勤甚公侯必復尚其勉



旃嘉泰辛酉八月癸巳

跋李伯紀青原詩

李伯紀丞相宣和中和為左史坐論京師水災斥去已負直聲靖康戒嚴定計城守雖不能解河東之圍然一時名望甚重高宗即位首用為相惜乎輔政日淺規恢不竟其後歷帥江湖厥有成效淳熙末諸子皆不在其姪申之進家集奏議請謚于朝孝宗似未悉其人予為歷陳本末聖諭云張浚比欣天監在上一言盡之有司請以忠定易其名制曰可今登仕郎曹佐出紹興初贈青原主僧師珪長篇觀其志趣亦壯矣同游向伯恭朱子纔可聽豈止翰墨之勝乎嘉泰辛酉重陽日

跋董體仁帖

前賢遺帖士大夫爭寶藏之非獨慕其名亦以禮不浮詞不枝為可法也近歲老成待後輩例稱契丈先達與新進皆用上覆否則訝其簡驩而不疑其侮段規也後世何觀焉今讀參政董公紹興末與曾彥及蕭長才帖雖視前賢交際之禮尚稍隨時其與數十年來足恭不情者相去已千萬里矣彥及名德廣長才名甲嘉泰元年九月彥及孫登仕郎忠佐請題其後



跋蕭臺詩

永嘉錢君文子序其曾祖姑蕭臺詩三卷刻板醴陵縣治復求跋語予觀詩三百篇有當時婦人女子所賦而後世文人或不能及蓋發乎情止乎禮義之難也景祐中歐陽文忠公序謝希孟詩云隱約深厚守禮不自放有古幽閒淑女之風欲引而進之衛莊姜許穆夫人之列請以斯言附諸卷末嘉泰元年九月二十四日

平園續藁卷第九

終

平園續稿卷第十

周益文忠公集五十

題跋五

跋文與可草書李賀金銅仙人辭漢歌

蘇文忠公謂七友文與可有四絕詩一楚辭二草書三畫四世少知音惟予一見識其妙處又有詩云斯人定何人游戲得自在詩鳴草聖餘兼入竹三昧他日觀其飛白復恨知與可之不盡况當百年之後不以蘇公之言求之可乎嘉泰元年降聖節書而歸之宗人愚卿兄弟

跋秦少章詩卷



右秦少章古律詩一卷宗人愚卿兄弟示予求跋昔東坡蘇公送少章詩云秦郎忽過我賦詩如卷阿句法本黃子謂魯直也二豪與楷磨謂其兄少游及張文潛也又云瘦馬識馱耳枯桐得雲和其見稱許如此今卷末有和錢蒙仲越州見寄一首東坡蓋嘗次其韻云二子有如雙白鷺隔江相照雪衣明嗚呼少章詩名為不朽矣嘉泰辛酉十月庚子

跋秦少章雜文

予少讀蘇文忠公帥杭時贈秦少章太息一首謂少章從吾游不及暮年而議論日新若將施于用者今觀此

文三篇豈溢美之言耶嘉泰改元十月庚子宗人愚卿及二弟携以相過敬題其後

跋向子諲遺事

靖康二年二月半金虜議以張邦昌帝楚三月七日受冊二十八日虜兵方下城京畿運副兼淮浙荆湖制置發運副使向公子諲以是月二十六日牒廬帥馬詢及淮西提舉鹽香范冲令密察邦昌家属聽大元帥康王之命是時邦昌尚未退聽而公憂國忘家明于逆順具存印檢紹興二年胡文定公安國貽書宰相秦檜曰向其忠節在今日可以扶持三綱蓋指此也至八年檜再



相孫近李光並參政事公以徽猷閣直學士致仕列其事于朝十二月省劄下公開具繳申押劄子者三人也明年正月二十九日詔送史館勅下禮部牒公照會牒尾侍郎馮楫也今六十餘年而公曾孫公起以公手稿及省部真本范冲忠義相勉之書聯為一軸將刻樂石傳之來世屬某題其後惟胡文定公以春秋學為諸儒倡結知高宗其褒貶是非得聖人之公乃獨以扶持三綱推許向公其有功于名教昭々矣贅言何益姑為記其歲月云嘉泰元年十月

跋蕭服劉逵唱和詩卷

觀中書劉公逵與蕭以甫手簡及沿途唱酬詩軸則其相善可知矣二公傳載四朝國史未必家有其本錄以示蕭公四世孫祺使併藏之蕭公初謫虔州而傳以為處殆傳寫之誤耶嘉泰辛酉十一月丙辰

廬帥靖康勤王跋語

宣和七年冬北虜入寇十二月十五日壬子徽宗得警報遣內侍梁方平以七十騎守濬州舊將灌以萬五千騎守河而命節度使姚古為京畿輔郡兵馬制置使兼都統制二十三日庚申有旨內禪辛酉欽宗即位丙寅詔畧曰金人犯邊諸道兵入合衛畿甸除沿邊守禦



人外令京東京西淮南西浙帥司于正兵併不係正兵  
內精選驍銳及名募武勇委兵將官星夜部發赴姚古  
使喚明年改元靖康正月一日丁卯虜犯相州戊辰犯  
濬州方平望風奔潰灌在南岸焚橋而遁時白時中為  
太宰李邦彥為少宰蔡攸領樞密吳敏知院事李稅同  
知耿南仲簽書所謂排難解紛不過羽檄召天下兵耳  
昔唐李德裕為相請詔書付宰相司乃下自是號明令審  
本朝亦皆三省樞密畫旨處分今廬帥所被御前劄子  
五道雖或二府擬進然內夫人直筆者書之用寶入遞  
大臣不與焉使當時有一德裕必不如此第一劄正月

三日也至四日宰執啟奉車駕狩襄鄧中宮皇子已行  
因兵部侍郎李綱越次乞對面除右丞守城之議方決  
故是日及五日無內批既而外攻內禦事勢益急故六  
日復催兵七日至再八日又催戰守雖備而虜已傳城  
相繼請和亦不暇督兵矣觀淮西所遣副將李齊以印  
狀具述到闕月日及帥臣劉憫跋語則竭力勤王大畧  
可見今憫魯孫復携以示臣之蓋生于是秋謹太息流  
涕書其後嘉泰元年臘日

跋東坡秧馬歌

東坡蘇公年五十九南遷過太和縣作秧馬歌遺魯移



忠心聲心畫惟意所適如王湛騎難乘馬于羊腸蟻封  
之間姿容既妙回策如縈魚異乎康莊殆是得意之作  
既到嶺南往錄示邑宰予家亦藏一本然不若初本  
尤精李璆道潤之語庶幾得其彷彿今傳三家乃至嚴  
臨猶幸不出一邑所謂楚人亡弓楚人得之也近歲移  
忠姪孫之謹已譜農器成公素志予嘗為之序其與禾  
譜並傳無疑矣璆字西美宣和中書舍人紹興四年守  
廬陵此必當時所題也嘉泰壬戌正月戊午

跋吳伸所藏曾子固帖

南豐先生早從歐陽文忠余襄公游素為王文公所敬

而與蘇文忠公友其門弟子則陳無已也今觀遺墨恨  
不執鞭嘉泰壬戌二月丙申平園周某書而歸之南城  
吳氏

跋尹焞帖

初寬字居之紹興初佳士觀尹彦明過九江時所與帖  
其人可知嘉泰壬戌二月戊子平園周某題

跋修禊序

唐太宗始得修禊序命趙模韓政馮承素諸葛正搨本  
賜群臣而虞世南歐陽詢褚遂良各自臨摹由是流傳  
人間今高宗皇帝臨定武石本則唐摹本亦止矣皇諸



孫臣善鑿好古博雅得紹興宸奎寶藏之屬臣某記其  
後臣嘗伏讀御製御書翰墨志近三十年而稱美此序  
無慮數四既曰測之益深擬之益嚴姿態橫生莫造其  
原又曰得右軍書手之不置自束髮喜作字晚年得趣  
又曰右軍揮毫製序用蠶繭紙鼠須筆道媚勁健絕代  
更無凡三百二十四字有重者皆具別體之字二十許  
無同者歷代論書遂集大成方孝宗皇帝在王邸詔摹  
寫為日課乃知二聖心畫雖曰天縱亦積學之助也使  
羲之復生將云非恨陛下無臣法恨臣無陛下法耶嘉  
泰二年三月三日具位臣周某某謹書

跋汪達所藏東坡字

右蘇文忠公手寫詩詞一卷梅花二絕元豐三年正月  
貶黃州道中所作昨夜東風吹石裂集本改為一夜二  
月至黃明年定惠顯師為松竹下開嘯軒公詩云喧  
更詆誚更字下注平聲而集本改作相詆誚嘻笑之下  
自添一聯云稽生既粗率孫子亦未妙今集本改作阮  
生已粗率孫子亦未妙按阮籍傳籍遇孫登與商略終  
古及棲神導氣之術登皆不應籍長嘯而退至半嶺聞  
有聲若鸞鳳響巖谷乃登長嘯也稽康雖有永嘯長吟  
願神養壽之句特言志耳其用阮對孫無疑某每按前



賢遺文不敢專用手書及石刻蓋恐後來自改定也水  
調歌頭題元豐七年三月二十五日黃州已刻石于公  
法帖第一卷遠方無良工失真遠矣浴室院東堂三絕  
句元祐六年六月作集本但添注遂良事歲月之序如  
此既內殿印銜幅不容輒易至于李杜佳句公嘗愛而  
錄之路難八句豈一時漏寫歟老泉詩則家雞也嘉泰  
壬戌三月甲寅東里周某書而歸之汪氏

跋趙弁雪圖

趙弁祖文往至臨安諸公貴人愛之凡秘書省及新作  
政府所畫照壁多出其手迄今尚存觀此雪圖風度可

想十六弟竒字祖穎紹興中屢為監司王初察之壻文  
采似水清安靜有家法蓋其祖吏部郎諱偁東郡人元  
豐末知登州民宜其政元祐末以河北轉運使權中山  
府兩得蘇文忠公為代故祖文祖穎字畫亦皆慕蘭去  
嘉泰壬戌三月甲子廬陵戶掾趙公括仲肅以示周某  
為題卷末

跋山谷與孫端帖

元豐八年七月孫覺莘老自祕書少監遷諫大夫是年  
四月山谷以校書郎召夏秋間到京所謂子實名端孫  
公之子山谷先娶孫公女故從俗呼端為大舅今集中



有次韵寄秦少游并題寄寂齋二詩即其人也嘉泰壬戌三月丙寅平園老叟周某書歸之皇諸孫仲肅

跋胡邦衡奏劄稿

歲在戊申高宗策士淮海胡忠簡公年二十有七因御題問治道本天之道本民公首答云湯武聽民而興桀紂聽天而亡今陛下起干戈鋒鏑間外亂內訌而策臣數十條皆質之天不聽于民又謂宰相非晏殊樞參非社衍韓琦范仲淹既批逆鱗復侵當軸聖主獨察其忠擢置魏科是時直聲已著搢紳間後十年當紹興戊午以審院編修官上書乞斬宰執時年三十七直聲遂著

於夷夏尚有可諉曰年剛氣壯也已而竄逐嶺海去死一髮隆興初然後還朝攝貳夏官年已六十餘議論益少卑之今覽奏劄殘稟忠憤峻厲視戊申戊午反有加焉其孫知邕州規將刻石傳遠見屬一言夫人之生也有血氣有浩然之氣少而剛老而衰血氣也衆人以之秉懿好德養之以直塞乎天地少老如一浩然之氣也忠簡公以之嘉泰二年四月

跋張德遠與胡邦衡帖

右張忠獻公與胡忠簡公帖或在廟堂或居遷謫或罹憂患無不勸人以學潛心于天所謂造次顛沛必于是



者今忠簡公家集亦有與忠獻九帖往來相應長孫槻  
守邕管宜併刻之嘉泰二年四月

跋陳少陽哀辭

陳少陽之死讀右丞許公哀辭思過半矣臨川梁光遠  
喜聞前輩遺事寄此以求跋予有少陽行狀蓋其弟南  
所作今錄示光遠宜繕寫入軸以便觀嘉泰壬戌七月  
癸丑

跋包孝肅公帖

右包孝肅公自帥鄉部坐失保任降知池州與同年手  
帖一通惟公剛正之名至今播在人口國史本傳云性

峭直然惡苛刻務重厚嫉惡雖至人情不及即推以忠  
恕未嘗偽色辭以悅人不為苟合不作私書親舊干請  
一切絕之今觀此帖亦非絕物離人者也後有戒子孫  
石刻末云天禧四年五月男珙奉命勒石按公以天聖  
五年登甲科當天禧時公猶未仕而于數年前垂訓如  
此當考嘉泰壬戌八月辛卯平園老叟周某書而歸之  
臨川梁克昌光遠

魯三異所藏盤松贊跋

德壽宮苑囿分四地分盤松在其北御製贊如右今太  
府丞張鑑以遺廬陵魯三異屬臣題在後臣嘗敬觀御



製祭土地文為此松也其全文云維淳熙五年歲次戊戌十一月日太上皇帝遣內侍張宗尹特設牲牢旨酒珍果香花致祭於本宮土地之神：有百職：各不同典司草木土事是供我遊湖園乃獲奇松植之禁苑百態千容婆娑偃蓋夭矯騰龍翠色凝露清音舞風醉吟間適予情所鍾壅培封殖久或力窮烏鳥外擾蟻蠹內攻神其勦絕勿使能終精邪竊據盜斧適逢神其呵逐勿使遺蹤常令勁質坐閱隆冬堅逾五柝弱異三桐歷千萬年鬱：葱：牲牢旨酒嗣錄汝功尚饗今併錄以遺三異使寶藏之御書後一絕蘇文忠公軾詩也嘉泰

二年八月二十三日臣周某恭題

跋魚計亭賦

徽宗皇帝宸文天縱最重內外制官非詞學俱優不在此選蜀人宇文公黃中以政和六年自右史除中書舍人既兼修國史又兼詳定九域志又修神宗寶訓八年言者疑公學術淵源蘇氏奉祠而去宣和二年秋上思舊人復還詞掖方且進用而公疑不自安明年以顯謨閣待制出知陝州又明年二月為滎陽趙公獻作魚計亭賦引物連類開闔古今深得東坡頽濱之筆勢適有天幸出入侍從身名俱榮者值好文之主也趙公字彥



思熙寧六年進士當元祐初英俊聚朝以奉議郎禮部  
編修貢籍首與孫逢吉彥同作職官分紀序後數年秦  
觀少游方繼之才名亦可知矣尋自秘閣校理遷太常  
博士知登隨商三州召為郎出提點京東刑獄攝帥青  
社年五十九奉祠就養閒居二十五年其子諱暘字又  
若紹聖元年甲科大觀三年為郎宣和四年知同州靖  
康中除少府監左右正言秘書少監建炎間直龍圖閣  
提點江淮路鑄錢子澤終胸山簿生渙終奉議郎通  
判沅州二子蕃學問過人恬于進取連任嶽祠居以詩  
名弟歲亦嗜學好修有子曰适慶元己未擢第距熙寧

已百年而家學不絕今藏得宇文公墨刻于兵火之餘  
求記本末于傳有之五世其昌並于正卿又曰世濟其  
美不隕其名請以是為祝規嘉泰二年九月辛亥

跋梁仲謨尚書奏稿

紹興初高宗駐蹕臨安外禦強敵內綏疲民六官百司  
事務紛至版曹師漕鮮能稱職惟縉雲梁公仲謨迭處  
三黜治繁以簡轉難為易士大夫往比漢趙張唐晏  
翼而已今觀奏稿近二十紙當虜來求成公數奏其情  
多詐昔與遼人戰爭議和至十有二卒墮其計今豈可  
不審旋詔遣歸朝人北還公引宣和靖康覆轍及近遣



趙榮王威彼皆用之願為龜鑑時論方倚張俊抑劉錡  
公乞令俊分兵進屯廬壽錡駐鎮江以備江陰許浦福  
山仍戒韓世忠臨敵持重至有二府不為諸將所服檢  
發英斷毋失機會之語又乞召楊沂中速還為行在不  
測之衛又言秦丞相捨用原棲紹謀以川陝付胡世  
將乞選知兵者助之其他如淮西不可棄捷報多失實  
岳飛宜以樞臣總帥江漢劉錡既帥荆南當留部曲為  
之爪牙至于諸路水災浙東經界擾民纖悉具奏不特  
此也十五年四月堦出東方秦自草赦文云永惟再造  
之邦當有維新之政宜除舊弊用表中興方且矯誣遷

就而公乃論政事失當左右前後不思所以答天心者  
盍依故事降詔求言此雖間兩社任言責議論未必敢  
爾而公不以典郡廢論思獻納之義忘寢與食鬚髮為  
白然後知高宗欲大用公益察其愛君憂國家禋廟莫  
非專以才術過人也惜乎命有所制不能展盡底蘊肆  
其諸子戒以文采或以治行自昭于世傳謂減文仲有  
後於魯宜哉嘉泰壬戌九月戶部郎官總領淮浙軍馬  
錢糧季玘以示周其敬題其後

跋黃通老尚書奏稿

邵武簡肅黃公淳熙庚子年八十有五易箚之際自草



遺奏一通事之至大莫如故疆陵寢之未歸事之難言  
莫如進退人才之未善公極力披陳幾于千言援古證  
今無一辭淆亂平生學力茲可見矣其子衡州史君瀚  
以某與公接武禁途道同志合使題其後昔荀卿論成  
人云德操然後能定能定然後應生乎由是死乎由是  
嗚乎公其有得于斯乎嘉泰二年九月

跋楊无咎畫秋蘭

鄉人徐丙字漢章博于學而瞻于文示予楊无咎手畫  
香草題曰秋蘭後有兵部侍郎章茂獻國子博士湯君  
寶跋語其說特未定也予老而學圃問諸園丁則曰春

蘭夏芷秋蕙冬菴葉莖花色及多寡往不同予異其

說徧以古書考之屈原離騷經紉秋蘭以為佩張衡東

京賦秋蘭被涯又思玄賦幽蘭秋華曹植朔風詩秋蘭

可喻潘尼贈河陽詩流聲馥秋蘭之類此言蘭以秋而

花也屈原九歌春蘭兮秋菊隋煬帝煙花  
注用此句陸機庭中奇

樹詩歡友蘭時往注春時也梁元帝詩春蘭本無色唐

太宗詩春暉開紫苑淑媚蘭湯之類此言蘭以春而

花也宋玉招魂光風轉蕙汜宗蘭抱朴子春蕙秋蘭陸

機悲歌行春芳傷客心蕙草饒淑景是蕙亦可言春矣

本草圖經蕙七月中旬開花至香是蕙亦可言秋矣故



騷經曰蘭芷變而不芳荃蕙化而為茅

說文荃蕙同音文選以蕙壁為

壁蓋合四者而言之湘君歌亦云薜荔拍兮蕙綢荃橈

兮蘭旌湘夫人則並言蕙壁蘭橈蕙擗芷葺司馬相如

長門賦博芬若以為枕席荃蘭而蒹香乃知四時香草

同出異名葉長青而花隨時自屈宋至漢唐皆于蘭蕙

互言春秋豈特邵伯溫見聞錄證黃氏之誤而已然則

園丁之言未為無據所謂禮失求之野歟嘉泰壬戌下

元節平園老叟周某書

平園續稿卷第十 終

平園續稿卷第十一

周益文忠公集五十一

題跋六

跋歐陽徹遺事

高宗皇帝即位南京宰輔不思將順求言之美意專為

身謀殺上書人鎮江陳東少陽撫州歐陽徹德明六飛

南渡並黜時相再贈二人朝奉郎秘閣修撰玉音惻怛

過禹湯之罪已錄孤賜田光於史冊草制者中書舍人

王居正也右丞許崧老既為哀辭某又抄少陽行狀授

梁君世昌刻之世昌曰德明吾鄉人也其孫瑀嘗哀次

事始里中文士鄧名世亦誌其藏將併刻之按唐韓文



公銘死事之臣張徹云嗚呼徹也世慕頌以行子揭也噎啞以為生子獨割也為彼不清作玉雪也德明生而命名與之同為國捐軀又同是真能晞顏慕蘭者先是郡庠繪晏元獻公曾子固汪信民謝無逸祠于講堂德明預焉其視沒世名不稱或遺臭萬代者孰得孰失耶德明弟衡子飛黃壻黃怙皆蒙恩補官飛黃終建安尉瑤蓋其子也嘉泰壬戌臘月乙亥

跋魯無疑所藏黃魯直晚年帖

右友人魯無疑所藏太史黃公帖其前一幅崇寧癸未公寓武昌竄宜州十二月赴貶時留與黃州何佶斯舉

者明年二月南過洞庭寄家永州五月初道由桂林題名于行勳大師榕水閣是月十八日至宜有賃黎秀才宅子手約今刻石秀峯帖中後六帖皆與融州都監高德修乙酉九月晦公卒自崇觀以後凡片文隻字禁切甚嚴至炎興間則雖宸翰猶俯同其筆法蓋一弛一張人事也或抑或舉有天道焉觀三代兩漢以來彝器碑刻沉埋蝕泐之後傳寶百世何獨公遺墨欬嘉泰壬戌閏臘丁巳

跋何居仁與張斗南序

士人臨江何居仁學廣聞多下筆滾：不休高談雄辨



常屈座人屢上南宮耄老而終觀送鄉人張孝子序議  
論淵源詞采瞻蔚胸次筆力可窺一斑其稱張君至矣  
古者求忠臣於孝子之門既舉其孝復勉以忠此誨人  
本末之叙也張舊名楠字南叔後改名斗南而字如初  
今監柳州酒稅敏達和易喜從名勝遊予友許凌志伯  
高弟也嘉泰壬戌臘月二十一日

跋馮軫所藏五帖

東坡書富文忠公神道碑  
富文忠之使虜所謂肅：王命仲山甫將之也蘇文忠  
之翰墨所謂吉甫作誦穆如清風也大雅烝民茲可無

愧富公孫樞密蘇公猶子侍郎皆題名卷末抑所謂臧  
孫有後于魯者嘉泰癸亥四月戊申

東坡書陶靖節詩

東坡云吾于詩人無所甚好獨淵明詩質而實綺癯而  
實腴自曹劉鮑謝李杜諸人皆莫及蓋嘗畫和其詩尤  
喜此四篇再三書之嘉泰癸亥四月戊申平園老叟周  
某題而歸之馮氏

東坡潁州詩

東坡以元祐六年秋到潁州明年春赴維揚作此詩題  
曰西湖月夜泛舟今集序以趙德麟餞飲湖上舟中對



月為題是也按公在潁僅半年集中自放魚長韻而下  
凡六十餘詩歷考坡所至歲月惟潁為少而留詩反多  
蓋陳傳道履常趙德麟歐陽叔弼季默適聚于潁故臨  
別詩云五君從我游傾瀉出怪珍又中間劄景文特來  
送行詩云歐陽趙陳皆我有豈謂夫子駕復迂邇來又  
見三黜柳共此煖熱餐瓊蘇自注云郡中日與叔弼景  
旣履常相從而景文復至不數日柳戚之亦見過賓客  
之盛頃所未有乃知攄發妙思羅列于此抑有由也堂  
名聚星今古相望使有俗物敗人意如坡所云其能爾  
乎馮吳江軫遠示真蹟敬題其後嘉泰癸亥孟夏九日

米元章上呂汲公書

右元祐九年春末改紹聖時米元章知雍丘縣上呂汲  
公書元章字畫豪逸非以畿令事宰相故加謹楷殆由  
切于為民有莊敬之心：既莊敬字畫隨之此與檄報  
隣縣打回蝗虫之戲異矣雍立本杞子國初以名縣嘗  
名州云嘉泰癸亥四月戊申

山谷書六一先生古賦

六一居士集共五賦山谷寫其三黃楊疑少作憎蒼蠅  
嫌譏刺耳外集別有四賦惟取述夢蓋因悼亡辭意俱  
妙類李太白即嘉泰癸亥四月九日



題趙遜可文卷

揚雄有言事辭稱則經此為屈原發也自國風雅頌之後能庶幾于此者其離騷乎或推為經雖曰太過未為無據也晁補之續楚辭二十卷自宋玉及漢唐至于本朝諸賢辭賦問對歌詩序引之類咸在雖一代英傑盡心力而為之遂以名世然其原皆出于離騷特體制殊耳予同年進士趙兄彥博字富文仕至權工部侍郎改事文學皆邊人而詩禮之訓尤切淳熙中予在西府富文之孫時逢字遜可年方英妙携葩窠彙一編為贅凡辭賦銘贊傳序及莊周八寓總二十餘篇意高詞古大

抵祖楚辭也予固已駭嘆其不可及後二十年遜可自尚書郎出帥大藩復示十八賦他文亦十餘篇意益高詞益古號山窻斐彙屬予訂之予既喜楚辭之有傳又慶吾同年之有後也昔杜牧作皇諸孫賀集序極道其歌詩之妙當矣末乃謂賀生二十七年而死使未死少加以理可以奴僕命騷是何言欤此與杜審言屈宋作衙官之語奚以異大率唐人失之於誕予無取焉今遜可年方強仕進修未艾他日復有如補之者出將擊節于斯文其附二十卷而傳也必矣予何足以知之嘉泰三年五月日題



跋楊廷秀對月飲酒辭

韓退之稱柳子厚云玉佩瓊琚大放厥辭蘇子瞻答王  
庠書云辭至于達而止矣誠齋此辭可謂樂斯二者嘉  
泰三年八月二十日

跋陸務觀送其子龍赴吉州司理詩

吾友陸務觀得李杜之文章居嚴徐之侍從子孫衆多  
如王謝壽考康寧如喬松詩能窮人之謗一洗萬古而  
空之嘉泰癸亥九月四日

跋劉共甫胡邦衡帖

右劉共甫樞密與胡邦衡資政三帖前二者隆興甲申

共甫守衢邦衡自海道罷歸經過時後一幅淳熙乙未  
共甫帥金陵邦衡隨其長子泳守官時也邦衡書二幅  
所謂季羔正字者王端朝也時紹興己卯量移在鴈峯  
惟知郡帖不知何人視題銜則乾道庚寅歲也最後予  
與邦衡書亦乙未歲者鄉人羅克宣次召出以相示今  
遠者四十年近則二十九年邦衡父子共甫季羔墓木  
皆拱惟予養疾山林王羲之云俯仰之間已為陳迹况  
歲月如是之久乎太息題其後嘉泰癸亥九月戊寅  
跋王獻之保母墓碑

銘墓三代已有之薛尚功鐘鼎款識第十六卷載唐開



元四年偃師耕者得比干墓銅槃篆文云右林左泉後  
岡前道萬世之寧茲為是實蓋古者範銅精巧鏤以為  
器生死皆用自漢錢幣益重銅禁日嚴不宿業于是  
陶土堅緻與鐵石等予得光武時梓潼扈君墓甄先叙  
所歷之官末云千秋之宅撫脫隸書而非鑄也又有章  
帝時范君謝君甄銘以四字為句厥後銅雀之瓦遂可  
作硯字亦隱起以此知東漢誌墓初猶用甄久方刻石  
紹興中予親見常州宜興邑中剝出靈帝時太尉許馥  
塚有碑漫滅惟前百餘字可讀大畧云夫人會稽山陰  
人姓劉氏太尉之婦也任昉在梁撰文章緣起乃謂誌

墓始晉殷仲文洪丞相迺跋云世傳東漢墓碑皆大隸  
疑昉時尚未露見其說良是惜乎洪公不見漢甄也由  
今論之自銅易甄自甄斷石愈久愈簡便矣嘉泰癸亥  
故友四明沈煥叔晦之子省曾出示越上新拓王獻之  
保母墓碑因詳記于後十二月壬寅

丁酉歲恭和內晏御詩草跋

淳熙丁酉九月戊午早赴明慶寺開啓聖節先是有旨  
令閣門依做太宗太平興國二年故事宣宰執侍從正  
任內晏觀擊毬午時入東華門過選德殿其後即毬場  
相對有大堂曰水堂其左為芙蓉閣右為凌虛閣至



則分左右朋立班樂作上乘馬來迎駕兩拜上御芙蓉

閣遠城花群臣起居上乘馬擊毬畢下馬再坐皇太子

以下奉觴稱賀上飲訖宣群臣就坐各賜酒飲醕乃接

盞上臨軒群臣分侍皇太子乘馬擊毬次左右朋擊屢

傳旨實擊既畢上乘馬歸群臣少憩幕次移刻晏選德

殿酒五行宣勸者再大畧如景靈宮對御時亦用雜劇

二段第四盞宣示御詩一首明日群臣皆和進其時為

翰林學士此其稟也不知臨江貢士劉君昌詩何自得

之後二十八年出以相示俾題其後嘉泰甲子正月辛

巳

跋蘇黃門左筠州施楞嚴標指

蘇文定公以元豐二年己未乞納官贖兄文忠公罪旋

自南京簽判謫監筠州鹽酒稅明年至官又明年四月

僧惟盛刻楞嚴經標指要義十卷成公時年四十三史

夫人四十一其九月印施十本贈機長老卷末親題名

氏嘉泰甲子筠幕王牒彥璋南夫得之求誌歲月觀公

文集後二十二年歲在癸未復題此經云十年來漸悟

佛法經歷憂患真心不亂今翻覆熟讀乃知諸佛惠我

無生法忍無漏勝果願心：護持勿令失墜蓋與頃年

求福田利益之意異矣二月辛丑平園老叟周某子克



書

題文氏雙秀亭詩

此予少年遺廬陵永和鎮文安國者今三十六年矣其  
子立方不遠二千里携以相示揚雄少作之悔令威化  
鶴之念徒耿々耳淳熙乙巳十月旦書

後二十年再觀于平園華隱樓嘉泰甲子三月望

跋韓忠獻范文正歐陽文忠與尹師魯帖

尹師魯素為韓忠獻王所重此帖可見又于范文正公  
義兼師友及論陝西攻守乃與范異是豈以水濟水哉  
歐陽文忠公與師魯尤為道同志合方師魯欲械治劉

滄文忠作諫官奏疏云寧移尹洙不可為洙曲有黨庇  
正指韓范也師魯竟自涇帥徙知晉州尋因仇人上書  
謫官而卒至嘉祐中韓公入相始復師魯官錄其子而  
歐陽公誌師魯墓亦極口褒美前賢先國事後伸朋友  
之誼皆可法也嘉泰甲子三月甲戌

題范文正公帖

右范文正公前一帖慶曆六年正月自邠赴鄧時與龍  
圖閣直學士田況書也况知秦州丁父憂仁宗詔起復  
又遣內侍持手勅起之不得已乞歸葬訖訖邊事求見  
泣請終制上惻然許之師臣得終喪自此始詳載正史



今公既以依道扣聖門告元均復欲讀書涉道而自樂  
前賢書問類如此可與識者道難與泛：不情者言也  
後一帖呼提點疑即謂使者或內外主判差遣學士則帶  
館閣無疑族家乃同姓考仁宗實錄及百官表必可得  
吳兄弟少年向學試為披尋此非八十老翁事也嘉泰  
甲子三月甲戌

跋趙逢原得母詩卷

高宗皇帝孝通神明宣和后歸燕慈寧振古未聞也風  
化所覃自親及疎時則有宗室伯深字逢原居吉之安  
福縣別母三十年後乃知流落蜀中某少時親見其迎

侍來歸名士如曾端伯及其子：長晁子西程詠之皆  
贈以詩後有朝奉郎任紳字公垂東州人靖康之亂與  
母相失齋禱戒天者十七年紹興和戎河南來歸徒步  
求母而得之奉事十有八年詔擢刪定官又兵部沈尚  
書介字德和湖州人宣和間父官濟南生德和而嫁其  
所生兵亂莫知存亡紹興末以秘書少監使北方往回  
厚賂驛舍承應人宛轉物色得母所在歸懇荆襄將帥  
捐金用間母遂與其異父弟偕來皆奇事也今逢原孫  
豐城主簿希恭出示舊詩予方修廬陵志當併記所聞  
備史官採擇以彰聖化嘉泰四年四月二十一日



題平園圖後

使臣王思恭昨寫予真求贊因記書對文苑之勞今又  
繪平園圖集予詩文於後用意益可嘉也嘉泰甲子端  
午日

題宋姓西園詩稿

金華宋姓字茂叔生于紹興壬申年十二月三日卓然  
自立為鄉里先進所知從呂伯恭學其論通鑑貫串不  
窮伯恭大奇之紹興改元第進士至筠州高安簿豫章  
帥漕王謙仲立宗卿尤延之鄭舜舉皆待以上客宗卿  
使虜以為書狀官歸循從事即掾融州秩滿辟廣西監

事司主管官漕張君量胡元之又待以上客蓋其氣象  
和平議論堅正明敏足以決事廉勤足以勵俗不幸年  
四十餘卒官平時于經史皆究極本原尤工詩篇興寄  
殊高遠嘗次陸務觀韵云欲求平易多成拙稍有新奇  
却未工得句直須參造化此身何必計窮通胸中所蘊  
可見矣其子自遠亦佳士示君西園詩彙為題其後嘉  
泰甲子五月乙亥

平園續稿卷第十一 終



月立公集  
平園集  
卷十一

十一





